

詔安縣志卷之十二

藝文志

藝文者山川之色澤也草木以秀華為榮織春如繡
 羽毛以炳蔚為麗映日生輝大地鍾靈挺英豪而開
 著作亦猶是耳詔雖彈丸高者競千巖之秀深者為
 百谷之王可俾其文采不彰而山川僅存韞耶昔班
 孟堅創藝文志列名字不錄其文蓋文不可勝載也
 是集也舊志所存重如拱壁新編所得珍若遺珠首
 奏疏尊宸聽也次書切民瘼也次記傳事蹟也次序
 跋次碑銘次賦次詩惟嫌體製之未備敢曰繁言之
 詔安縣志卷之十二 藝文 一 三百五十六

厭多作藝文志

奏疏

拜手颺言之作或闡揚對命或披瀝宜忱關乎朝
 者載在史書關乎人者載在家乘若關乎地者而
 聽其湮沒不傳則守土者之責也敢或遺乎志奏
 疏

奏蠲丁錢疏

宋蔡襄

臣伏見泉州漳州興化軍人戶每年輸納身丁米七
 斗五升年二十至六十免放臣體問得僞閩日前諸
 州各有丁錢惟漳泉等州折變作五斗至陳海納

糶土之後以官斗校量得七斗五升每年送納價錢
伏緣南方地狹人貧終身備作僅能了得身丁其間
不能輸納者父子流移逃避他所又有甚者往往生
子不舉人情至此可爲嗟嘆伏惟祖宗恢復天下大
去無名之歛然諸州身丁尙猶輸納眞宗皇帝哀憐
百姓困窮之弊祥符中特降御札除兩浙福建等六
路身丁錢四十五萬貫其時漳泉興化亦是丁錢折
變作米無人論奏因仍科納遂致先朝大惠不及三
郡三郡之人引領北望迄今又四十年矣臣聞聖人
以生爲德以孝爲本今陛下之民不肯養子不亦累
詔安縣志

卷之十二 藝文

二

三百八十二

于生生之德乎先朝所行之事有所未及陛下推而
行之可謂至孝矣伏望陛下進成先帝之仁下恤遠
民之苦蠲放三州軍丁錢悉令依建州例歲納口錢
于生民性命全活豈少也哉臣褻不勝感激謹具疏
奏聞

奏薄征下壤疏

明陳汶輝

洪武二十五年四月十日吏科給事中臣陳汶輝謹
表爲薄征下壤以息邊民事臣伏讀周禮嘗嘆其治
出於極文之後而直接于唐虞夏殷之先雖秦漢刪
文反朴之令皆無及者豈不以治當酌時勢之宜不

責于文質之守國家建治實準周官三公六卿之守無不阜成而司徒保息之方則未體悉邇者命官沿邊建堡周於防禦殊不知民居離散無可防禦者則今雖防民之奸而未嘗養之於善也創業垂統之始可如是乎臣伏覩沿海士民荒饑之後困苦之狀皆繇課征所致蓋其田廬沒于流沙而租課迫其輸納陛下雖廣求民瘼參酌其便宜者以定其制而所厚者洽於京畿平野之間而弗均于濱海遐邊之地愚臣以爲當體周官保息之政以寬沿海沙壤之征田沒水者蠲其租園多沙者汰其米彼其民艱於耕作詔安縣志

卷之十二

藝文

三

三十九十七

樂於寧息且逢豐稔之年雜以魚鹽之利漸致富庶易於成治不然魚鹽已輸租矣而田園沙水靡常者又征之臣恐開國之初已不堪命民不寧居矣垂及百年官吏日以貪酷風習日以華侈風沙日以湮沒哀哀邊民呼無死所矣此豈聖聰所忍聞哉伏乞睿旨勅下沿邊諸郡勘明而削除之乃造冊以定其制庶幾遠近一體同享太平之休以接成周之治臣汶輝不勝感荷惶悚之至謹具疏奏聞

乞蠲从沒牛米奏疏

明許海福

福建等處承宣布政使司漳州府漳浦縣三都二畝

臣許海福謹奏爲乞恩蠲除久沒牛具稅米以蘇民困事本縣三都四都六都九都先該丙午歲元守漳州右丞羅良因備禦潮寇鍾猛虎等大興三都溪東土橋屯田取牛六百隻耕種贍軍及羅良爲元平章陳友定所併時牛隻俱存每牛稅米二石民納無怨至我朝洪武元年二月御史大夫湯和遣裨將參雄引兵徇漳州守將萬戶陳納以軍民版籍納降至二年冬十一月本府按籍追徵米麥并及前項牛具稅米一千二百石時牛隻死亡略盡本府行縣拘集都分領牛軍民賠贖前米民已不堪至二十二年牛隻

死盡無存適遇糧長丘德何東高承縣牌拘拿牛隻人戶陳仲海翁玉吳宏等約四百人米不可解易之以布布不可用復易之以銀民間納米頗易辦銀甚艱比至交納該催糧長斗級人役却乃嫌銀低醜抑令傾煎每銀一兩蝕幾二錢納完守取收批又不勝畱難才蹬冤聲塞道苦怨徹天臣目擊情狀深爲扼腕竊爲牛隻若存民食其力米輸于官是爲上下交益軍民兩利今牛隻死沒垂五十二年而小民虛賧稅米不廢司府視爲國課小民情莫上達民惟邦本本固邦寧根本有傷禍必貽國恭惟皇帝陛下靖艱

踐祚革除弊政如恐不及量臣遠方小縣弊民之政
莫甚於虛賦牛貝稅米一經聖心必加憐恤臣來京
時被害小民祝臣以所奏必允臣辭父兄誓以所奏
若不允不歸古今天下豈有五十二年堪耕牯牛不
死牛死已久聖君賢相焉有忍視民困而不蠲除者
緣係乞恩蠲除久沒牛貝稅米以蘇民困事爲此具
本赴通政使司具奏伏候勅旨永樂二十一年十月
十三日行在戶部左侍郎署本部尙書事臣黃福奉
聖旨我皇考初定閩中隨調長興江陰等衛官軍分
鎮戍守復差侍郎夏原吉巡撫釐革弊政今覽海福
詔安縣志

卷之十二

藝文

五

三百八十八

所奏朕爲惻悼該屬有司視海福真爲有媿矣着戶
部速行福建布政使司將久沒牛貝稅米盡行蠲免
永不復徵別行吏兵二部推選忠勲大臣領勅前往
福建巡撫盡革吏弊民害欽此

奏設縣治疏

漳州府漳浦縣二三四五等都士民某某等奏爲乞
恩比例添設縣治保障地方事臣家居漳浦縣三都
南詔城當閩廣交界之衝山林盤鬱土地平行人烟
稠密舟車輻輳二四五都環抱東北糧僅萬石戶滿
三千實海濱之一巨鎮也地離本縣二百餘里中隔

半沙油柑盤陀等處山林險惡道路崎嶇官司難於約束民俗相習頑梗租糧逋負累及懦弱之包賠詞訟煩興勾掠經年而不出毆公差而一方騷擾賴人命而闔鄉搶奪強凌衆暴視如飲食是以永當里甲之家跋險而且憂危杯水不救薪火額外辦無名之錢歲費百餘金接濟不敷俱供息於市井之富民推避不前甘重攬於積年之光棍傾家蕩產十戶九同窮極思亂勾引連境山獐海艘嘯聚百千白晝剽掠乎鄉村據險截劫乎商宦歲無寧日馳報府縣逡巡不進兎窟而鷹始飛猫眠而鼠又出一方生靈荼毒

甚矣弘治十七年鄉民呈設縣治蒙鎮巡衙門議調漳州衛後所軍守備茲土其謀不爲不善但武夫悍鷙罔思民瘼每遇警急束手坐視不曰官軍不敢妄動則曰巡捕官軍稀少且黨令軍士凌虐小民濫受詞狀欺騙萬端火熱水深無可控訴正德十四年分巡道周僉事按臨鄉民又呈設縣上司議設通判一員駐劄民方翹首企仰太平不意畏難避險常川在府無事則擁衆而來徒勞里甲之支應有事則望風先去不管地方之安危是以民有兩頭當差之謠賊有免勞相送之誚調軍禦暴反以爲暴設官護民祇

覺厲民嘉靖二年江西饒州兵備副使范奏爲陳言
地方事乞將漳浦之南詔饒平之神全分拆二縣今
神全縣治已設改名大埔獨臣等一方未蒙區處嘉
靖四年布政使司陳布政蔡叅政相繼經臨臣等又
呈設縣蒙觀形勢慨然准行轉呈巡按劉御史批從
長議處行本縣勘結反被奸惡歇家書手人等惡其
害已扶同詭捏回報下情無繇上達臣等竊思地方
之計保障爲先緝盜之策郡邑爲切語曰馬不敢肆
足者啣轡束之也民不敢恣情者法令束之也百里
爲邑古之制也安有曠絕二三百里無郡邑而居者

詔安縣志

卷之十二

藝文

七

四百十一

俗不爲頑爲惡不弱肉而強食者無是理也重熙累
洽之世在在均沾聖化寧忍置一方生靈于法制之
外而不曲爲之處乎臣等豈不知勞民傷財但南詔
地方城池完固衙門鼎新所少者惟縣與學耳工費
不過二千金見今貯庫淫祠銀約有三千餘兩動支
綽有餘裕豈不知官多民擾但漳州府通判三員漳
浦縣縣丞二員截彼就此員不加增又豈不知新設
縣學便有廩膳齋門庫子等差但取盈於市利橫索
於包賂吮血於豪猾空杼於盜賊彼此較量所獲不
啻十百抑又有大於此者俗日偷變日惡崑崙之火

鄉土盡爲之煨安得不亟爲之慮哉爲此昧死上陳
伏望皇上沛一視之慈恩振沉迷之赤子乞勅都察
院咨行提督汀漳軍務都御史會同巡按福建御史
轉行守巡官親偕相度體訪如果地方形勢攸宜民
情允協比照遞年分拆平和大埔惠來三山峽水等
縣事例將漳浦二三四五都分裁設縣治以便里道
適均徭差便利庶官近民則法令無扞格之虞民知
禮則閭閻有於變之俗不特今日爲弭盜安民之策
實萬世長治久安之畧也

書

詔安縣志

卷之十二

藝文

八

三百六十二

韓昌黎爲一代大儒僕僕三上宰相書不免爲後
人譏訕者以其所上之書皆爲一己而言也若事
關一方之利弊志切萬姓之痼瘼抵掌而談藉手
以獻卽未見諸行事半多屬之空言而其忠厚悱
惻之意豈可泯乎志書

上南撫臺移檄暹邏宣諭紅裔書

沈 鈇

詔安縣鄉官沈鈇謹陳爲借兵暹邏遠攻裔航以絕
海氛事竊照紅裔侵入海島肆掠內地所恃者惟據
澎湖錠城爲鼎足耳幸蒙祖臺偕總戎謝君誓師征
勦命副將俞君遊擊劉君調集官兵三千餘名飛渡

澎湖直搗巢穴而祖臺同巡海孫公祖守道程公祖
巡道沈公祖躬督舟師出入風濤駐劄中左所且望
料邏烏嘴尾海而調度之以故一擒裔首新高文律
再戰于料邏古雷間兵威震動首裔膽破自知澎湖
不能守矣佯退而斂跡大灣尤爲心腹之害者僉云
夷已宥遁兵可暫收官卒亦以次回省然此兵家常
態亦未可盡信卽祖臺綢繆盛心豈能安乎夫大灣
去澎湖數十里雖稱裔區實泉漳咽喉也沿海商民
捕釣貿易往來必經卽呂宋一島酋長亦恨紅裔絕
他利而必怨其久駐大灣爲他國梗也但呂宋恐未

必能攻紅裔而邏邏島酋長稱雄三十六島所畏威
者紅裔嘗納貢之矣在紅裔必受邏邏節制無疑想
此裔暫泊大灣勢決未回而遊棍李旦乃通裔許心
素之流也夙通日本近結紅裔茲以討私債而來且
祭祖爲名目突人廈門豈有好意不過乘官禁販密
買絲綢裝載發賣諸裔併爲番裔打聽消息者宜畱
之爲質俾貽書諸番勿擾我邊海可也徑聽其逸去
何爲也哉爲今之計二三長老懇望祖臺給以公檄
選擇武士帶諭邏邏島主嚴令紅裔速歸本土不許
久駐大灣引誘日本奸倭互市仍會巡海孫公祖謝

總戎俞副將劉遊擊諸君斟酌速行查得澄邑李國輔林宗興同安楊榮爵等謀略膽氣殊有可觀且諸曉水道素熟裔情善譯裔語或委任責成聽自顧船隻自備糧餼禮物直往暹邏說其島主俾宣諭紅裔名還散歸不許久駐大灣且得窺探裔情并李旦等交通情狀回報此上策也蓋暹邏管轄六島而紅裔數千附籍互市每歲納貢于暹邏者決不敢抗命伏望祖臺速吊諸壯士面試詢問果有可用乞假以材官職銜賚公檄駕哨船以往暹邏島主如何回話倘得成功此祖臺之鴻恩尤泉漳兩郡士民之望日下

詔安縣志

卷之十二

藝文

三百七

北風正起水勢甚便所殺然早發非止一閩之幸實國家之福也若缺于李國輔等諸人素不識面只聞其名姓匪敢代爲私請至於同安海澄詔安諸邑奸民駕舟出海置違禁火器米貨接濟裔航無日無之巡海戈兵受賂放行縱擊到官多從賂脫無有報上司者比比然矣卽有報聞便以官勢賂脫此泉漳夙弊良可慨嘆缺日觀海寇出沒桑梓罹殃不揣迂朽聊述見聞請正伏乞採擇酌議施行閩省士民永戴功德不朽矣

南灣居閩粵之間當兩省咽喉設漳潮副總兵鎮守
轄福廣防倭等營永爲海峽重鎮倭裔不敢窺伺漳
潮賴以安枕信明驗矣今澎湖可做而行之請設遊
擊一員坐鎮湖內仍設左右翼把總哨官爲之輔佐
擇閩中慣歷風濤諳練水路者克之無事則演藝守
汛有事則料敵出奇俾諸裔不得窺中土併議久任
責成凡兵之進退糧之出入咸遊擊是賴三載加銜
六載成勳特陞大將每歲或委廉幹佐貳不時查點
如兵士有虛捏月糧有尅減叅處查究追出銀兩以
克兵餉庶知勸懲永奠沃壤始與南灣一鎮竝爲閩

中屏翰矣此設遊擊之策一也夫有官守必有兵戍
戍守哨探之兵非二千餘名不可每名月糧九錢此
定例者其糧餉或出自漳泉二府或支自布政司庫
原有定議沿海濱捕漁之民慎擇以克之或撥出洋
遠探若干名遇賊則攻擊之或撥港內守城若干名
有警則應援之遊擊標下親兵與把總哨官人役各
自另設不許占用水陸戍兵一人不許虛冒戍兵月
糧一分其月糧按季關支該道委海防館照名數鑿
鑿包封逐名唱給不許將官總哨代領以防尅減尢
不許防館吏書需索常例以奪兵食此遊兵管堡宿

倭亟宜申明禁革之凡汛地之守探具數總報院道
以便查考裔情之緩急飛報院道防館以便調度一
或誤事自有軍法庶水陸竝進犬牙相制彭島一帶
可保無虞此議戍兵之策二也夫各寨遊每船板薄
釘稀委官製造價銀十不給半一遇海濤便自潰裂
安可出戰今宜令駕船者領價監造每船歷幾汛方
許脩理載幾汛方許改拆而拆造僅給半價則造船
駕船均出一手或不敢以弊漏之舟自試蛟龍之窟
耳若火藥尤紅裔所懼者中左所火攻已破其膽大
舟四集自爾宵遁則火舟當多備甚明而大鏡大船

詔安縣志

卷之十二

藝文

十三

四百二十一

尤不可少者宜造大船十餘隻安置大鏡十餘門布
列港口俟寇至夾擊之裔首憚我長技不惟不敢侵
我疆土且遠遁無敢再出矣此議造船火器之策三
也澎湖山地雖云頑土不堪墾田乎而遍度膏腴之
區或可佈種禾穀者卽黍稷麻苳柑棧菓木均可克
兵民口食之需須廣招同安海澄濱海黎庶乏田園
可耕者多四五百人少亦二三百人俾挈犁鋤種子
以往就居撥地聽其墾種每人量給二三十畝仍帶
妻子方成家業併畜牛羊捕釣漁利少資糊口仍禁
遊擊總哨各官不許科索粒食各戍兵下班之日有

能用力種植者亦聽之明示十年以內決不抽稅俟十年以後田園果熟酌量每畝抽銀二三分以爲犒賞官兵之用務使兵民相安永遠樂業此議名民開墾園地之策四也若官旣守海必有公廨居之戍兵寓民亦須藉營房寮舍爲藏身計今議蓋遊擊府公署或在鎮海港口或在娘媽官前當查舊基拓克之標兵量撥百名環創左右仍設倉廩數間爲貯糧之所擇寬廣爲教塲以備操練而暗灣口相對二鏡城及東北面大中墩各量置管舍以爲守禦方免各兵暴露船兵管兵輪流撥用少均勞逸卽名募種植居

民或令自蓋房舍或官量給房價咸附兵營居住相依爲命守望相助此議設官解兵管之策五也夫彭湖大灣上下官兵船隻把港則番船不許出人紅裔不許互市無待言者然泉漳二郡商民販東西二洋代農買之利比比然也自紅裔肆掠洋船不通海禁日嚴民生憔悴一夥豪右奸民倚藉勢宦結納遊總官兵或假給東粵高州閩省福州及蘇杭買貨文引載貨物出外海徑往交趾日本呂宋等裔買賣覓利中以硝磺器械違禁接濟更多不但米糧飲食也禁愈急而豪右出沒愈神法愈嚴而衙役賣放更飽且

恐此輩營生無路東奔西竄如李旦黃明佐之儔仍走裔鄉代爲畫策更可慮矣不如俟澎湖島設兵鎮後紅裔息肩暫復舊例聽洋商明給文引往販東西二洋經過澎湖赴遊府驗引放行不許需索阻滯回船之日若帶有裔人在船卽拏送上司以奸細論庶可以生意飽商民之腹亦可以裔貨增中國之利俟澎湖設官建城之後可徐議爲之此議通商便民之策六也以上迂議六款前五款似可爲澎湖善後之一助後通商一款亦聊備後日通變之微權伏望祖臺不棄迂朽仍會藩臬巡海守巡司道洎總兵副叅等

詔安縣志

卷之十二

藝文

十四

三百九十

衙門面議定妥一面題請一面舉行匪但澎湖一島堪與南澳竝稱重鎮而八閩士民永有攸賴矣若堪用防守澎湖遊擊把總諸員則昨所譚武進士洪應斗武生楊榮爵林宗興陳通等及原攻逐紅裔千戎吳廷縉把總王夢熊顧思忠李國輔等均可選擇而使以閩人管閩兵音語相通情意相洽不必他委若它省武士雖以赳赳稱而土地人民恐不相宜更乞裁擇曷勝悚息之至

代請蠲豁賠亡書

戴冠

爲殘邑倍困賊亡沿無可沿累無可累急祈洞鑒矜

憐事切照詔安邊粵斥鹵稔猶仰食潮揭饑則行乞
載塗自頻年林莽暴骨呼籲無門而通邑沿賊逃亡
一件疊奉上檄尤不得不爲殘喘請命者本縣逃亡
無徵銀若干兩先因人戶業去米懸豪有力詭射飛
洒或荒沙礮确災傷連歲而軍興無藝逼迫不得已
而逋竄種種等弊然始也一人逃而累衆人繼也衆
人逃而累一戶又其繼也逃愈衆而失愈多不得不
派之通邑有司知考成而不顧民命當事知取盈而
不恤本計至正供失額而沿賊之追如故沿賊不省
而正供愈失額何異割股療饑醫瘡剗肉今日又有

詔安縣志

卷之十二

藝文

十五

四百二十二

難言者矣濱海遷後地愈失耕比閭應募十復四五
失耕無賦不耕無民其存者鵠面鳩形擔荷絡繹日
枕藉僵仆於道路其紛紛去者皆與其父兄子弟沿
賊他戶之逃亡者也今不能不累其父兄子弟代賊
應分之糧差又累其父兄子弟兼賠昔日之沿賊欲
剗內耶將剗誰氏之肉欲割股耶將割誰氏之股眞
職某所謂累無可累沿無可沿雖冒鈇鉞之誅而不
忍不爲此區區請命者也某愚昧歷觀前代隱戶度
田皆爲兵革創痍蠲息休養起見若丁夫漸還南畝
徐下隱覈檢括之令賦不沿而自足不然雖日繼以

法未必取盈在此所盈者果在此也某職催科尤職
字民日夜征忡泣盡血繼爲此具請

代請勻接夫役書

戴冠

爲兵衝答應絡繹兼站馬力堪虞仰祈謨斷節宣畫
一事切照力役民命攸關力均則民逸故聖王逸以
使民在今日兵衝匍匐不暇給尤不容不悉爲折衷
俾勞民無頽尾之嘆者也職照詔安舊驛上至雲霄
驛八十里下至黃岡司四十里交代所以然者雲霄
又七十里方至漳浦若兼站則必窮一百五十里之
力黃岡又一百里方至潮城若兼站則必窮一百四

詔安縣志

卷之十二

藝文

十六

三百九十五

十里之力非兩日不至故舊制最爲得宜詔安之上
而直抵漳浦下而徑至潮州自煩年虐使任意敢怨
怒而不敢告哀始也今征討大師絡繹幸蒙憲臺建
復站夫非勘合不許應付澤及溝瘠至兵將啣命往
來猶然越雲而浦踰黃而潮道次淹留往還動至旬
日甚有浦夫越使至郡郡又強拏至泉僵仆道路生
還十無二三其幸而免者每遇農時錯過舉家失望
而雲霄黃岡之安坐而傍觀者自若職謂平時愛養
民力道里程途猶須酌量況今輪蹄不輟瘡痍未瘳
而征討往還之夫動數千百叢爾殘民盡驅猶未克

數合無請乞裁酌詔夫答應北路止至雲霄南路止至黃岡彼此別豫接替大兵夫則令平和地方一體幫勻答應度勞逸均而積困紓昔之向隅者永永樂更生矣

代上經畧南澳書

戴冠

爲東南門戶不可不守棄險資敵非計措置規畫宜先事竊照底定必收全局制勝在扼咽喉自臺灣孽氛闌據廈門當大師破竹長驅猶然擄死相持一旦瓦解遠遁實仗天威制勝算無遺策令賊根本矢據望絕勢窮幾於全局全收矣某愚猶謂海中扼要南

詔安縣志

卷之十二

藝文

十七

三百八十四

灣中左金門銅山事同一體譬如造舟一牢百牢一扁百扁南澳閩粵咽喉尤孽醜必爭今諸島節節布置而南灣猶在所畧某敢憑臆見陳之南灣峙漳潮界上海門天然關鎖隆萬初懲海寇曾一本許朝光吳平之亂特設漳潮副總兵鎮守轄福廣防倭等營東西一水之近復翼以柘林懸鍾兩寨遊臂指聯貫屹然半壁砥柱也比開代邊塵不驚籓籬盡撤賊臺灣至甫定巢穴立署僞帥重兵於此先揜要領然後連綜南下指肇高惠潮爲倉窖空其積粟聯翩蔽海而歸以收合徒衆羽翼遂成其散遣內地招誘赴海

如市者亦於此淵藪於此接應設有鉅鎮枝梧賊必不能越此飛渡諸島非餓殺鳥獸散耳是此地向不過爲不逞出沒之防今則爲逆氛數十萬衆死命之寄事機先後間不容髮萬一死灰重燃風便突至茲地先爲賊有我咽喉梗塞彼飛揚如意或令因糧於我藉兵於我方欲爭以持久之全力於計左矣某愚謂南灣應設官兵三千員名配罟艚二百隻統以鎮守總兵官蒐討訓練永固東南門戶彼地四灣汎洋巨艦只堪外薄深港守兵刻嚴斥堠警至罟艚先其未泊迎擊巨艦旋轉多碍而小船運棹如飛此軍果

立勞逸主客懸絕賊定破膽不敢謀抑沿海金湯相望茫茫巨浸皆城隍閩粵千里內外永斷風塵之警其於制勝攻心全局全收功尤不待再計決也一應器仗資裝炮銃火藥除所在官司原有驗貯現存修估配給外其軍糈浩煩一時未易取給官帑或應就地設處如本灣原墾田約若干頃募佃耕作分其稅入可養兵若干名鹽田計若干坵招募築晒可養兵若干名網桁漁船採捕課稅可養兵若干名皆是尺土屬王非如畫地作餅置之爲不毛之區收之則爲軍國之用倘蒙酌允定議遴委幹局正官一員并名

屬弁中有曉其地利諳其土俗者一二人到彼協同
勘估確造畫一欸項數目報查必與建置用度符合
方可坐論起行或有未敷別議撥足大約以捐斥疑
有疑無之利贍扼要必不可少之兵爲國而不費國
爲民而非病民經久救急均無便此此某愚蒿目隱
憂誠恐時會差池措手莫及不敢不冒昧披陳仰徵
廟算採擇以稍申報効萬分之一者也

記

史者所以記一代之盛衰記者所以傳一事之沿
革雖大小不同而文章則一列禦寇曰帝王之事

詔安縣志

卷之十二

藝文

十九

三百五十五

或隱或顯億不識一當身之事或聞或見萬不識
一目前之事或存或廢千不識一苟有識而勿傳
猶之乎不識也此昔賢作記之旨卽今日存記之
意也志記

南詔全城記

明陳 疊

正統末年四方多事吾閩盜起沙尤蔓延至漳漳無
賴子弟被脅爲黨與出入鄉導五縣爲罹其患吾漳
浦一縣則尤其甚者賊始入縣縣官奔潮州人民携
老抱幼孺提挈衣裝食物倉皇走匿無所遇賊殺死
殊衆或幸入瀕海衛所城城中人稠屋狹井泉寢涸

毒氣渤鬱蒸結被病死者相枕藉比暹室廬焚燬食
貨孳蓄器用無存而寡妻孤子哭聲載道至今言之
恒爲盪然方是時惟南詔一方安全無恙蓋非無賊
也賊至得人爲之備不能肆其毒也厥備謂何南詔
有城周遭數千步居民數百家巨室好義者十餘輩
比屋絃歌號稱富庶當賊至漳浦則相與聚議曰此
賊貪殘聞吾南詔富庶不數日必來矣城之外有傑
士涂姓名膺者深沉有智謀又仁且勇世族重於鄉
里行義出於等倫宜屈致入城保此一城生聚而衆
人服其約束富家出穀饋餉庶乎有濟衆皆唯唯遂

詔安縣志

卷之十二

藝文

二十

四百十二

相率詣膺告以斯旨膺慷慨入城圖指方畧誓協心
力以守不然者有重罰未幾山寇果相踵至團集近
地設策將入城膺與衆謀皆先破其機牙不得發旣
而山賊製梯作長匱障身至城下膺嚴號令分堞備
守鎔鑄鐵汁傾灌矢石交下賊被傷死十二三皆披
靡退明日海賊至禦復如之膺又密遣強健以計夜
入山海賊營殺其首賊且爲書赴潮乞援時廣東僉
憲張惠泉州人行部至潮立選援兵若干人刻期抵
南詔賊知城守固援兵且至已無能爲自相怨罵散
去衆喜無恙跪拜謝膺膺曰皆若等力於某曷預卬

自潮導縣官入城官兵尋亦至漳賊黨盡殘滅矣時
正統十四年己巳八月二十三也爰自己巳至今二
十餘載遭時大平民物生遂南詔一方之人咸謂吾
有今日實膺全城之功且聚夕晤思今不置巨室好
義者林朝坤介封給事中吳公永綏屬言垂之後往
予備位廣藩行過南詔聞膺全城事進而問之膺言
娓娓無矜色因審其爲傑士拱手加敬焉當群盜至
漳浦一縣之人有遇賊者有至滿城死相枕藉者有
室廬焚燬食貨孳畜器用無存者而南詔安全無恙
膺之功再造之功也人所思念宜乎其不置也詩曰
詔安縣志

卷之十一

藝文

三

二百九十九

中心藏之何日忘之其是之謂歟抑聞活千人者其
後必封膺所活者一城生聚奚啻千人膺雖老不出
爲世用膺之後尙昌盛光顯未艾哉是爲記

南詔拓城記

同知許 判

漳極南閩鄉窮處山環九侯赤坑之雄秀水涯象溪
大海之吐吞其地夷曠迤靡民居稠密有以控制百
粵而屏蔽八閩也地名南詔未知何始按昆明之間
有六詔蒙舍併五詔爲一號南詔相傳有使入閩經
此曰風景好似我南詔名因襲之荒落不可考宋爲
南詔場置西尉主之後爲沿海寨統以巡檢建場立

寨土堠木柵耳元至正間右丞羅良據漳州以汀漳盜起南詔乃必經之地命屯官陳君用于溪山險處砌石爲城鑿土爲濠所以浚立界之防也國朝置把截所尋廢承平之後孤墉無統敝扉不闔弘治甲子冬流賊突入城中攻劫四散擄殺莫可誰何人皆駭鹿以散家無帖席之夜事聞當道議以南詔叢山吻海盜賊出沒不測有城當守以軍乃奏調漳州衛後千戶所軍守禦其地顧舊城狹隘不足以容更斥西隅而大之仍砌以石而濠之舊而圯陋者增修焉官衙卒廬咸列其中翼然海濱一巨鎮也是役也工傭

輒木灰石之費取給於府帑之美餘畚插之後則量人戶貧富以爲差更始於乙丑冬三越載而訖工舊城四圍六百四十五丈高一丈二尺茲拓而大之周圍凡一千三百六十丈其高比舊增四尺焉主之者巡按監察御史饒公塘布政司叅議黃公華徐公貢也承而規畫之者知府羅侯列知縣梁侯瓘也監督以底于成則知事柳君聰也鄉耆民喜其成也以予生長於是親見甲子之變當有言以記之竊惟王公設險以守其國崇城濬隍政之紀也佚能思初安能惟始世守之無斲則存乎其人也南詔山海奧區宋

防之而未有城也元城之而未有統也今而城大彌
固以官兵統而守之是當道諸君子所以防患之周
民可恃以爲安矣然人離於兵久則習安而情易玩
地離於兵久則積銷而險易湮將焉恃哉武弁非牧
于民將安誘哉必嗣諸君子而作夫牧者不至逆旅
其官人致其和險戒于夷也人和則畫地可守矧據
金湯之固其可犯哉先聲寢謀逢兵不亂一方其永
賴之矣且地雖小實漳要會之所爲閩咽喉此而克
守則牽制敵人於疑阻之間智可謀勇可攻弱可備
遠近可得暇豫以應之非特一方利也僉以予言爲
然庸書之以爲後民牧告焉

詔安縣志

卷之十二

藝文

二十三

三百九十六

漳州府進士題名記

明李東陽

科目之制中選者必揭名于榜榜不過一再揭又刻
名于梓以爲錄則傳之四方顯且加久而進士科尤
重則又刻名于石樹之國學以示後世其顯且久蓋
倍蓰焉國家之重科目如此若四方麗縣人材所自
出地又以爲國學所立石非觀國游學者不可得見
乃或倣茲遺制立石學宮使凡天下之生於其地游
於其學者皆得知科目之爲重是其名與國同久而
其顯也益又甚焉然此特有司之事不著于令故科

日之士恒有而茲石不恒建惟文獻之富及政制之周且密者則有之漳州府有六屬縣縣之附郭者曰龍溪士多龍溪出六學之舉鄉貢及進士者科不乏人有司彙其名氏題于府學之壁自始題至續錄閱若干歲矣吾友姜君用貞來知府事觀其學宮見其紛墨剝落寢不可辨乃礪巨石刻其名以府縣分列以科舉年歲先後虛其下以俟續刻者寓書京師屬予記予惟國之於士也非獨富貴其身而又顯其名故在鄉選有貢士之名在甲科有進士之名天下之名爲尊官顯爵者未嘗不藉此以爲重及摭名責實

臺有評省有覈周達無滯者名能官潔清不污者名廉吏守節不撓者名忠臣而其大者則紀于太常書於景鐘藏于金匱石室天下之所謂名者至于此而後定則官爵皆不足賴況科目乎夫科目之設將以求賢才爲天下用也賢才非天下所常有故歲計之不過數百藩計之不過數十而鄉計之不過數人于此之中求所謂廉能忠節之大蓋一代而不數見也故爲士者非徒榮名之難而命名爲尤難此石雖久未足賴以爲重也況有貪污邪佞者出乎其間人將顧指而議之邪夫士而不能爲官爲吏爲臣不可以

名科目之士人而不廉不能不忠不可以名爲人由是言之則無俟乎作養傲厲之政亦可以興矣而況有作而傲之者邪漳大郡其自科目爲尊官著偉績有茲石所不能載者而其名固在也苟名茲石者皆感厲奮發以廉能忠節爲天下用使後之論者求之金匱石室間則茲名也不益爲科目光耶若筌蹄經史梯航科目惟茲石之爲慕則其自待于世亦輕矣姜君名諒浙江嘉興人與予同舉進士廉能有文章其在漳也救荒除盜尤以進鄉俗作人材爲務非徒爲善政者漳之人士其亦思無負于姜君也哉是爲

詔安縣志

卷之十二

藝文

二十五

三百八十二

記

詔安修學記

明許判

嘉靖二十年甲辰筠陽廖侯來蒞茲邑靖寇安民惠孚閩海之濱期月而留意學校以廟學創始成於倉卒之際洎今日漸傾圯制亦未備有餘慨焉廼謀諸邑博姚君熙相與振飭舊者葺其敝缺者置其制綜理密也明倫堂東西爲兩齋爲號舍後爲講堂東西爲兩官廨大成殿東西爲兩廡爲戟門又前爲櫺星門左爲儒學門外爲泮池是皆創於昔而今漸以敝者敝斯葺拆者易良漉者易鮮葺敝以圖新也陳生

茂高輩屬予記其事竊原廟學兼備之義有斐髦士
選而納之膠庠藏脩息遊率於孔子之道共學焉學
其道則思祀其人祀其人則思必志於其道廟妥先
聖之靈固報德報功之典仰止之下亦神默化之機
唐倣裔教廟設塑像聖人在天之靈必不之歆何以
潛啟人文耶今聖天子特詔撤象祀主以革數百年
裔教而慰廟靈可於是乎仰止而默化卓爾之道焉
上之人所以爲髦士處者如此冀夫學之成也試言
學之道爲諸髦士告可乎孔子博約之教精一之傳
也從博約而學者所由以適於道也然有主朱子先

博文後約禮爲知行先後之學者有主陸子博文約
禮爲知行合一之學者皆學必能知行然後可以
造道成德其教同也偏則流於支離禪寂之弊非教
使之然也若先後合一之功則用功下手處固有不
同然亦不甚相戾道一之編可考也于今日聖廟之
教亦有合乎英宗皇帝命憲臣提督學校賜之飭諭
首條大意欲學者於聖賢之道知而能行敦德性之
善行黜口耳之浮誇養成真才以爲朝廷用聖朝所
以爲教如此由教而入知至至之知終終之豈非學
者所當自盡哉我邑文教漸興豈無循博約之訓勵

身心之學發爲渾灝之文出際亨嘉之會以翊皇猷以贊王化求不負聖朝教養之意賢令尹作興之功哉存乎其人言有待也若徒竊浮靡之辭以爲進用捷徑學非身心誰顧名檢奚足爲世道倚賴亦奚足於學校炫一時之觀乎

遊六峒丈量學田記

沈 鈇

余邑僻壤以都名者有四而二都在萬山中叢谷峭嶺半插天表至六峒則畚民所居者峒有田數十畝九侯巖僧主之會土姓爭佃不決前邑令公判田入學宮嗣爲許氏富豪獲焉今邑大夫夏公奉督學洎

詔安縣志

卷之十二

藝文

二十七

三百九十二

郡二千石檄查前田力請還學舍業有成議矣先檄庠友陪涂三尹勘量之諸友怵富豪氣焰無敢逞夏大夫懇余同行余曰舍其田而芸人之田孟軻氏所誠也顧學田爲養士之需先聖精神命脉繫焉不佞敢憚勞與避怨哉二博士江君李君命庠士十二生約余于閏八月六日起程屆期則何生先遯矣許生亦不至諸友曰何生爲避咎也許生爲避嫌也匪有它者余與林生樹觀許生琦葉生經林生魁期沈生經綸沈生侃沈生汝棟沈生東黃生正色吳生鯁臣竝轡而驅午飮于李公樹余戲謂諸生曰昔宣尼父

過宋羣弟子習禮樹下桓司馬伐木而逐之諸君子
今得無戒心耶午復渡一溪澗灘水迅急假竹筏以
濟歷金溪諸社鄉人以壺漿迎謝却而去日哺餽于
神宮坑蓋庠生沈登瀛寓所也是晚移宿于沈生東
田舍其地曰坪林去六峒不遙矣諸友徐步山巔觀
新月如斗大余曰蘇東坡謂山高月小蓋自下而觀
之也茲自上而觀之則山愈高而月愈大矣非去天
稍近者哉諸友領之七日質明起捫蘿涉險望峰巒
如揖如拱不啻迓客也迤邐抵楓樹岡蓋畚客境界
矣中隔坑塹石笋嵯峨流泉滿衍行者苦之過此則

崇崗叠巘一舉目魂搖搖作怔忡狀兩人相掖方達
山頂上下山谷皆畚人所種植者良久至峒編籬爲
垣覆以菅茅鱗次而居者僅三四家男子束髮腦後
婦女椎髻于前與城邑迥別余拉諸友坐峒屋中觀
高山當戶溪澗流前別是一小洞天也涂君洎巡宰
陳君宋君至促諸役持衡較量田畝且問土人疆界
云自峒口赤竹坪起至桂子寮中有山腰紙寮塘岍
橫石洞裡桂子寮前後直至龍滌而止皆六峒境內
者其云六峒則山之總名也峒凡延袤五六里田凡
若干畝丈勘凡兩日始畢事涂君率二巡宰胼胝泥

中惟恐負邑大夫任使間以禾苗方茂坵畝參差不無掛漏大都盡六峒田已還覺舍則尺土非富家物矣夫前田乃僧產也遡其初不諗捨之者何人但先是鄧蔡二令尹已送庠中爲師生肄業費庶幾有逃墨歸儒氣象富家豪旣攘之緇流又欲奪之膠庠此不惟孔氏臯人亦佛氏所共惡也自非邑大夫夏公扶植斯文則原田終爲富室有矣原所自蓋繇聖道大明幽谷必照卽六峒雖稱荒服僻區乎而濟濟衿珮聯翩雲集無論沃土顆粒得薦清廟而馨俎豆俾六峒畚氓一旦喁喁從善將易侏儻而爲馴雅之習

詔安縣志

卷之十二

藝文

二十九

三百九十八

固于今卜之矣語云君子居之何陋之有余且爲六峒山靈幸爲六峒畚民幸不啻爲膠庠士私慶耳矣是行也犇走凡五日始抵舍呼燈篝筆命侍子紀之以傳好事且質之有道者夏公名宏東粵海陽人涂君名來覲江右豐城人江君名化鯉閩之惠安人李君名若標粵之高要人陳君名本道粵之全州人宋君名民信瀨之山陰人庠士林樹觀輩皆余邑產也記成爲萬曆丙申閏八月十有一日

新創石橋東岍學稅記

沈 鈇

詔新造邑也士多食貧卽所司亦靡有以旣富方穀

之道振作之者蓋七十載于茲矣乙未秋督學使者
檄邑大夫清六峒學租不佞借青衿士愆憑之顧租
有主者庠中師弟子毫莫沾惠也每三歲大比泊歲
考冊籍費用不貲例出自諸生而貧士殊無所措二
庠師待校漳郡饘粥膏秣咸自備之嗣有諸生輸助
未及其半而師與弟子均病矣會不佞借邑侯夏大
夫築東溪石橋橋之東爲溪雅村南岍一條深丈餘
廣可數十武堪作市廛處也曾名逐末者居焉諸豪
室輒欲攘爲己利不佞懇夏大夫牒送學宮作諸生
科考冊籍泊二庠師府考之需荷夏大夫首肯計橋

詔安縣志

卷之十二

藝文

三十一

四百二十二

東岍見規市廛三十間歲可得六金也岍之上下尙
存曠地不妨居民赴學請佃如例納稅僉議歲支一
兩五錢與庠中記室爲造科考二冊剩金四兩五錢
積三歲計有十三兩餘矣二庠師送考與馬蔬食從
此出焉不復貽累諸生也在二庠師免懸磬之憂在
諸弟子省歛送之苦在吏書亦罔賠償之累誠于庠
校有裨者此邑侯夏大夫之惠也諸庠士願乞一言
垂之永久不佞謂國家建黌宮儲雋才以需世用至
隆師儒以訓迪之豐廩餼以養毓之典甚備矣茲市
廛所人僅涓滴矣奚足爲輕重顧此彈丸之區勢豪

市猶不無伎心沉詔士貧甚一遇科考資斧弗充矧能歛辨冊費與庠師蔬食者耶是學稅之設固亦涸轍升斗也爰書之爲詔庠士世守云若市廛姓名與輸稅數目具載公檄中不具論

邑侯鄭公重修儒學泮宮碑記 胡士鰲

詔自嘉靖辛卯分符建學今八十載矣草造之初規模未備諸殿廡門庭之制與夫宮墻泮池橋道之屬質具而已嗣雖浸次修庀而時絀於力人膠於樸率因陋而簡就之未稱也邑侯芝山鄭公宰邑之三年治成政飭播民之和而秩神之祀百隳幾悉易睹矣

詔安縣志

卷之十二

藝文

三十一

四百

是年秋報成於兩臺兩臺表其治狀爲諸邑最更畱以惠我釋菜於學會秋霖池頽崩潰櫺星之前除幾夷于池橋梁就圯甬道凹仄公喟然嘆曰是尙可憇他役而後吾夫子宮邪於是謀諸學師明宇章先生懷宇賴先生畱更營之捐俸鳩工佐以醵贖以泮池湫隘不受堂廡諸水廣闊三之一砌石爲址實以灰而加釳焉中爲砥長五十有八赤翼以扶欄上豎以坊額曰泮宮此皆拓前而加葺之者也坊上砌石爲周除旁兩達以步欄外樹塞墻高丈有八赤廣屏三門而止額曰宮墻萬仞此皆增前之未備者也他殿

廡廷楹之蠹者新之垣繚之壞者聖之一石一甃一
工一備皆官乎取直無厲民是役也經始於八月己
卯而竣事于嘉平之臍乃與二先生泊諸士弟子合
樂以落之不佞士鰲再拜而颺言曰詔之爲學也山
則衆九侯而朝南華水則涯大海以爲壑此其亢爽
旁魄之氣不府之物异而府之人文固也顧未邑而
前士韞于質矣而質卒弗勝文今濠于文矣而文乃
弗勝質此果有所醞結而未開也哉吾謂夫子之道
高深象天地美富軼百王構爲宮墻俾學者遊其門
升入其堂室以揖讓其宗廟百官而于及門跬步地

聽其圯阨而弗治曷以作諸人士感奮興起思哉夫
無待而興者豪傑也若盡人皆有所感奮而興起凡
民皆豪傑矣矧士之不爲凡民者耶今公爲之穹而
宮墻洞闢而正復日羣諸弟子以優遊振德其中美
哉夫雲漢遐作之功今日始開之矣則夫得門而入
者於焉視爲暢步爲趨爭自憬奮雲蒸霧涌以附于
人文化成之盛勗諸亦惟今日僉曰善是宜爲記以
交志夫不忘者公名化麟字文兆浙之唵人登萬曆
癸卯順天進士章公名元昇直隸和州人賴公名可
大閩永定人皆能協恭有成爲諸士楷云

重建武安王廟記

胡士鰲

城西祀關武安王非今日矣三嬪而定於茲地始闕
宇未豐嘉靖壬戌倭內訌城將壞邑侯龔公覩王夜
巡城故城完締廟立坊以表之歲久棟桴礮裂前模
湫隘衆乃謀再新焉糾閒規隙地不加擴也上人勾
龍有餘居矣祇樹金鋪財不科索也施捨檀越無吝
家矣壞材究奇增飾崇麗邃殿幽宮神棲儼焉飛甍
雕櫺人觀聳焉事舉甲辰之臘成奏乙巳之秋功力
便焉此非衆人之能也署所郭將軍之所鳩也縣黎
神君之所主也神關協帝之所默相陰翼也廟成徵

詔安縣志

卷之十二

藝文

三十三

四百〇三

予爲志予乃言曰人知所以祀王矣亦知王所繇事
乎自古英偉烈彥齋志含耀炳異人寰啟敬祀也者
豈乏哉過首陽者吊夷齊之魂適安毫者欽逢干之
躅其它如吳相胥吳興憤王至俠烈伉猛也然皆祀
不數世享不出其里孰如玉沒於漢季迄今而廟祀
益皇窮谷極陬人藝青木之香家抗黃土之時此何
以故人間世惟忠義一心萬載不磨哲凡共有當王
之事漢帝也掃黃巾若敗葉馘良梟德縛禁陷七屯
若承蜩淹螳是王不朽之雄威夫人而能言之而非
所以不朽也獨其間關故主萬死不移漢燼欲頽一

綫力抗麥城之役穆然就冥若泯泯者蓋垂五百年
而一顯於玉泉之刹又垂五百年而再顯於蚩尤之
戰威靈烜赫億兆分身捍患卹災隨叩輒應以故上
而都掖下而閭井以至魍結侏儻靡不供祀伏臘如
帝如天奔走恐後忠魂義烈河岳星辰此則劫灰不
焚永無銷滅是王之神所以久且大而世世不朽者
也今夫執途之人語以王之繇孰不怒髮刺肝思踵
芳烈況以豪傑亢爽有命者乎此賢愚所以共捐茲
廟所由景彰也雖然爛麗之必爲圯蠹也廟之蠹於
世數者也吾不能以今日衡萬禩之功禋祀之與詔
詔安縣志

卷之十二

藝文

三十四

三百九十三

無窮也人心之鏖於忠義者也吾有繩萬禩多今日
之舉矣是爲記

詔安縣新建主簿廳碑記

明金子璣

紹興連城金子璣自嘉靖辛酉承乏詔簿甫下車時
當孔棘猥以文事叨兼戎務驅馳鞅掌殆無寧歲及
癸亥春木灣梁公拜脚新命來尹是邦矢志協力播
順名和喜倭警之告康椽林之底捷三饒之蕩平官
與民而相安心對境而俱怡攸躋斯堂撫今追昔溢
然興曰維詔有簿維簿有廳維廳有記孰開其先曹
侯之功孰記厥成賈公之筆旣宅其宇迺新厥敞爰

登其記壽諸厥石以垂日月以詔同官以備前修以
貽世考也前博士金華賈崧曰今之詔安古之南詔
也唐以來始屬中國附治漳浦相去二百餘里政教
未周迨我朝嘉靖辛卯始設縣治官止令幕其地勢
巖紆分界閩廣俗裔民貧山海交寇北有走馬溪東
有雙髻山西有白葉峒皆爲奸宄弄兵之區雖經官
兵勦滅而餘黨時或作耗嘉靖戊申撫廵奏設捕盜
主簿以靖地方曹侯福浙東會稽人繇成均偉器選
授是職及抵任見衙宇未建謀欲構之或以材之難
致工不易集爲言者侯曰建衙非以圖安蓋奠厥居

詔安縣志

卷之十二

藝文

三十五

四百二十三

而後可專志于民也于是度地令衙之偏吏居之前
而經營焉指俸以助其費督所役以助其工前建親
民堂五間以贊政治旁建側屋十間以居徒御次建
寢室五間後建小居五間旁列爨壩西立精舍共計
二十有一楹且大書天監在茲盡其在我以自警勵
五月落成工不告勞而民不知費人始服方識練習
足以拔艱而治劇也設施旣久治效益著廉以立威
慈以示惠秉心處事未嘗一毫苟簡繇是往來走馬
溪者屏息矣竊據雙髻山者授首矣唯白葉峒倚山
爲巢常出剽掠侯承備兵多方招撫日得八十餘以

給田輸租遂爲編戶而東廣始奠枕矣悉力覃恩要
務必舉守深田半砂二隘而行旅無阻督洪淡金石
漳潮三司而烽火息警監懸鍾銅山二倉而軍糧不
乏委征課而積負盡輸差理獄而全活甚衆詔民喜
其來而悲其暮自昔佐治贊化於庶官中如侯者殆
不多見也秉性不苛頗與時忤幾二載而卽去留之
不可得而思之不能忘也旣予將去詔庠耆民沈仕
等遮道告予曰曹侯建衙之功泄民之善昭人耳目
久恐湮沒厥記以貞諸石而庠友葉瑜朱道一許逢
斗沈大體等皆曰是誠不容泯予惟侯治詔之善殆

難悉數而建衙一事特其疏節耳然有是官卽有是
居有是居斯有是政而一勞九逸暫費永寧又後人
之所深賴也使嗣佐是邑者思侯建之難則必葺敝
補頽以相傳于可久而詔之簿不患聽政之無所矣
思侯治詔之善則必相時度勢以盡其經畫之宜而
詔之民不患無所依矣詔之簿爰得其所詔之民爰
得其依則侯創始垂繼之功豈惟民不能忘凡生于
是地而爲民之秀與官于是地而興教化者均可以
脩其業以成其業亦何可一日忘之是爲記

橋梁之政自古重之故其財必取諸民而其權則歸于上自夫上之人或浚其民以爲利而下之人或弁髦視其上而不肯輸其財力以爲之用於是乎其悞與焉者旣已怠棄之於弗顧而其稍振飭焉者又恐陷乎染指之譏而不敢動橋梁之政日以寢廢而病涉者衆矣人見其病涉也而或惻然焉富厚之家或捐己貲以徼福利之報緝黃之徒或募衆建以廣方便之門蓋曰此可以助上而益下云耳不知天下之事有其任則有其責則其成毀修圯之間乃爲禍譴福佑之所及今夫橋梁道路之修乃有土者之責彼

其人之責不自任以爲功而吾乃貪之以爲己力可乎是徒以丘民之微而竊夫公上之權者也而胡可以福利冀上之于民旣以取之爲憚而募民之舉則指十斂百指百斂千紛紛求請甚於頭會蓋用之者十二三而漁獵之者十六七矣且其所斂者豈盡皆其人之欲與夫遠方外邑商賈賓旅之所出哉類吾宇下之民迫於義而動者也乃使此輩得以爲名是委其權於下而竟亦用民之力者也奚便之有嗚呼王政不行而世之爲民上者其失所重久矣予嘗以此說藏之于心而是歲履端之首適有詔安大尹鄧

公白屏者以橋記來請予詢其故則曰邑地東有泮尾溪爲閩廣往來絡繹之津舊募舟以渡故雨水時溢或風潮迅激不利涉邇以海警日夜過師頗梁之以木而頻年修葺勞費且無已時蕃入境亟欲石梁之以圖堅久會歲且荒歉未遑幸今年和民悅諸務稍暇乃召匠計直鳩衆授役以去歲十月十二日鑿石興工計今歲春夏間可告成事矣貲皆取之吾民有力好義者樂助之者也蓋於是時已擢二守三山以去而諸工料調度則俱授有成筭云夫詔于邑不爲繁沃而其民亦皆纖嗇爲生非有陶朱積居之富

卜式奉公之誠者也公爲之逾年能舉數十年未興之役期成之以數月至使瀉鹵纖儉之民咸樂輸其財力以爲之用雖其去役不少輟此果何政之修哉蓋公嘗爲令寧洋以拊循愛養著名詔之民已知有公矣比加秩進俸來詔一下車卽詢疾苦矜寡弱輕徭役省里甲平訟獄修廢墜潔己正身未嘗分毫有所過取于民民之信公深於慈父以故公令一下而遂翕然從之惟懼其成之不亟也夫不忌乎染指之嫌不假于徵募之擾而竟能以民之財之力成民之事使便及于衆而其權則歸于上公知爲政哉予加

公知所重而又恐其無以喻諸後乃從公請而爲之
記橋之長六百三十丈廣九尺爲趾九十有八灑水
爲九十九道以是歲五月望日竣工距其始造日凡
七閱月靡白金以兩計凡千百有六十題其名曰廣
南圖識也公名于蕃字价卿白屏其別號也廣之海
南人其來詔也蓋以五品俸行令事云記之日爲萬
曆辛巳四月十有五日

重修龍尾橋卽廣南橋

明鄭化麟

閩封之訖爲詔民海壩而作邑蓋福廣交會康莊也
邑徂東有泮江吳越甫二里許西咽百川溝澮府焉

詔安縣志

卷之十二

藝文

三十九

三百九十五

東支大海潮汐咸焉向假船以濟第風濤每怒湧舟
楫且顛危矣病涉奚翅也遂令此者礱石而砥之通
行稱便顧事屬始創且中流深泊處專力江臯夷地
草草焉迄今水道軼嚮激盪乎夷易爲衝流計覆敗
三十餘空遂四五年所莫之修者良以工涉力微難
強就也丁未夏予來涖詔前此頻年水異今司署廨
館驛暨城墉樓櫓頽頹殆甚余竝工亟庀之旋諸鄉
老進言曰泮江一渡孔道也橋而圯矣與無橋梓同
余卽捐俸貲如千金命西衙李君釐焉而以耆民林
汝韜許榎葉練率羣匠計程亦時爲省眎越次年初

夏堤址輦之隳仆揭之輿者從者自是乎坦夷矣韜
等謀鐫石丐余言紀若事夫成梁爲王政之一故君
子爲武侯毋爲東里僑而廣輪紀澳梁諸役剏借修
竝臚汗簡以剏建之利澤不修葺不續往古來今何
完不礪藉後之當此者而廣余之志胤余之緒則此
江此橋永有攸濟矣因書以與之

朱文公祠碑記

沈 鈇

文公朱先生解釋四書五經傳註先儒謂集羣聖大
成者孔夫子也集羣儒大成者朱夫子也業從祀兩
廡而清漳一壝立祠特祀蓋文公登紹興制科繇寶

詔安縣志

卷之十二

藝文

四

三百九十三

文閣學士改知漳州抵任以移風易俗爲首務訂禮
儀禁浮屠嚴男女禮塔朝獄之會大布孝悌明訓甫
朞月道化宏敷視素王攝政一變至道殆伯仲矣文
公之徒有龍溪陳安卿者雅好濂洛書出所著自警
詩爲贊公叩其蘊具見本原嘆曰吾道南來得一安
卿爲幸學者以北溪先生稱又有三山黃直卿者號
勉齋從公受學以女妻之其編禮書屬直卿更定時
道學大行千里景從詔有楊仕訓仕謹先後從游登
進士第爲詔生色實聞文公風教而興者邑人士夙
創丹詔書院世祀文公而陳黃二先生陪祀數百載

比設縣治建文廟而文祠居左方誠一奇觀也柰歲久祠圯不佞鈇曾偕邑宦胡君士鰲蔡君肇慶醵金築牆而榱桷瓦料靡所從出深爲愴然值秋丁祀邑大夫盛公暨庠師周君余君惕然動念盛公捐俸助一百七十金倡其端而周余二師捐貲贊其成周師以會試北上余師督理工程尤爲勤勞冠帶庠士許嫌經營尤篤卽不佞鈇與兒津同袍翁竟成張廷範貢生胡光嗣沈東張養默許載玄輩量力樂助未數月而祠鼎成文公北溪勉齋三先生象貌一新堪與漳隴竝垂不朽焉盛父母清標媿政迥邁卓魯周余

詔安縣志

卷之十二

藝文

四十一

三百九十四

二師橫經課業媲美濂洛而建文祠又其最者它日邑傳別有紀載茲未盡述盛公諱興唐天啟壬戌科賜進士粵西灌陽人周師諱廷選萬曆癸卯科鄉進士粵東番禺人余師諱洪訓明經選士粵東大埔人并書之以待後之學者

盛侯重建朱文公祠記

周廷選

漳隴屬邑曰詔安者其令鼎新朱夫子祠祠成諸鄉紳子弟謀鐫石紀歲月垂之不朽屬文於不佞不佞革退自念昔韓退之爲王南昌紀滕王閣柳子厚長沙紀戴氏皆部吏也不佞叨塵僚末曾共勩迺事敢

以不勉辭聞之其先丹詔書院奉祀文公年久圯壞
下建學宮之左以議猶暫移武場之右荒郊僻陋穢
禱不雅識者遙遙動念然卒未有任鼎建之責者我
侯崇禎三年孟春涖邑秋祀愴然詳究其所興廢之
繇遂捐金二百七十兩爲之倡而詔之鄉紳庠士樂
助雲從於是調匠度材悉以良起於崇禎辛未歲孟
夏之丁卯訖於季冬之乙亥不耗國不耗民凡若干
楹瓦內外悉具虛敞深靜像貌偉然一新祠春秋集
師儒無不遂仰止之思回思此地化爲榛墟邊豆委
之草莽者幾數十餘年一旦爲賢侯所經慮鼎而新

詔安縣志

卷之十二

藝文

四三

三百九十三

之詎偶然耶兩漢傳循良若文翁諸君子悉以興學
較尊經術著不徒以刑名術法著我侯是舉毋論式
靈有地異日經術大明海濱鄒魯賜宏也石室書賢
將與文翁並傳矣遂命綴次其事泐石紀之然慙不
文又繫以辭使祀者歌之以答侯之休烈其辭曰

昔齋郊莽兮俎豆不光天祚紫陽兮重建鏘鏘脉
遡洙泗兮密邇宮墻基衍丹詔兮霞祀生香伊誰
考成兮西粵星郎匪淫匪僻兮濂洛肺腸公卿景
仰兮士庶不忘報公之德兮胤祿其昌鑄公之勳
兮山高水長

夏車兩侯合創懸鍾文祠祀典碑記

沈 鈇

在昔朱文公先生過化漳邦凡海濱山陬均濡化雨靡不畏壘尸祝者銅山懸鍾二所雖起在海濱乎而濟濟衿佩右于上國嘉靖丙戌叅藩霞山蔡公捐貲櫟二所創祠塑像以祀禪青衿朝夕瞻仰庶幾羨牆見也銅士起家青紫崇祀俎豆而懸士待興缺祀已數十年矣歲丙申詔邑侯銘乾夏公抵懸閱卸石灣海埠一帶商船泊奏立主家交引貿易就于境內歲抽數金爲文祠祀費不佞從吏其間力公典諸青衿

詔安縣志

卷之十二

藝文

四三

三百八十九

沾沾溥惠焉無何一宦驀掠之又無何一宦奄據之祠之春秋薦祀幾不給也會愬之前邑侯鄭公業令歸之祠中而豪宦子霸奪如前會邑侯從龍車公抵任諸青衿具牘以請不佞從吏益力公謂文公教洽海隅宦家子誦法久矣忍奪其祀乎果爾怙終自有三尺在宦家子翻然惕悟盡歸畢稅于文祠中公命青衿歲擇一人收稅鏹永充祭需積有餘羨祠宇之脩祭器之具咸取資焉是卸石灣懋遷之地蔚然紫陽文物區矣嗟嗟報本反始人道常經崇惠報功國典攸係文公傳註大有功于吾道守漳遺化尤有惠

于漳人不淺者蔡公建祠爲懸士山斗夏侯首創灣
稅以秩祀于先殆爲豪宦攘奪茲藉車侯恢復之無
非爲懸士崇祀地也諸青衿悲世情叵測大典或湮
爰勒貞珉以垂永久屬不佞記之不佞曾憶宣聖司
寇于魯未幾而齊人歸鄆謹龜陰田其俄頃功化誠
足多矣而麟經著作細書必詳蓋慮後遠也茲埠稅
一瓊利耳乃諸士藉以薦名禮輯祠舍具永賴之夏
車二公倡復殊勛均不可泯亡絕滅而督水寨守戎
劉查二公署所篆千戎粥宇周君協理千戎丹廷吳
君旭東李君輩咸謂是舉也崇先儒惠後學抑豪強
詔安縣志

卷之十二 藝文

四十四

三百七十七

報功德四善俱備其勛績當與鍾山滄海竝垂不朽
矣誰爲變易用書之以貽後人世守勿替者蔡公名
潮浙之臨海人嘉靖初以名進士任閩省分守左叅
政夏侯名宏廣之海陽人車侯名登雲廣之博羅人
俱以粵進士知詔邑

邑侯黃公重建丹詔城隍廟碑記

林日瑞

邑之有城隍以爲民也君子勤心民瘼修救祈禳必
齋心以告而邑之休咎神實司之若以侈心徼福則
君子不事焉抑國家命甲凡新宦是土者必齋宿必

是矢心明神而後視事是天子顯以法令激勸有司復陰借神以惕之則城隍之建亦朝廷涖官意也詔邑建於嘉靖間城隍基是時詘舉蕪草創成事文明之規以缺今日我侯英六黃公下車以來邑無廢典野無冤民神明之聲溢於海宇乃一旦欣然以更新城隍爲己任捐俸倡義衆皆樂助遂緣舊址闢而廣之輪奐之美丹雘之飾視舊百凡有加東偏得隙地復建數楹以爲新官齋宿之所於某年某月鳩工及某年某月告竣傑棟崢嶸層簷翬飛重門軒豁四字玲瓏寶像莊嚴羣庶齊肅是洞天福地之府而庇民

報主之弘規也僉謂不可無述徵言于余余聞之夫子曰務民之義敬鬼神而遠之戒媚神也媚之一字臣子當戒然至於忠君愛民之心則媚于天子媚於庶人卷阿之音直足千古由斯以談以忠愛之故而行媚卽媚于鬼神可矣季梁有言聖王先成民而後致力于神致力于神則不得言遠矣君子愛民之心無已苟可薦其馨香致其禋祀以徼福於神又何力之敢愛則我侯之致力於神正其所以務民者與况夫百年之陋振於一旦至斷也齊宿有舍不至委君命於草莽至敬也土木之需得於捐俸及得之施者

不煩官帑不費民財至惠也董役之任最難其人不以染指則以廢事侯以公心用之人以公心應之期而竣事至敏也一舉而衆善備侯之爲民以事神也不旣勤且鉅哉則神降之福動能有成我侯受之矣侯諱元立字某直隸之六安人繇鄉進士起家涖丹詔三年報政行將以福詔邑者福天下所在神明且賴爾主矣是爲記

建射圃記

盧洪聲

古天子以射選諸大夫士盡禮樂而可數爲之立德行射者聖王之務也詔邑建治未百年規制粗備城

詔安縣志

卷之十二

藝文

四十六

三百八十七

垣雉堞去學宮不數武而近諸子衿士之射于澤宮者故未有圃也其有之自江藩朱公始公明德懿親忠貞鯁亮天子方大用公廼假公郡司農攝司馬十年秋臺使者又假公攝詔安令攝令之二月百廢具修而茲圃告成爲堂一堂下有亭長濶若干丈牆稱之鳩材量工費凡若干緡諸大夫士樂其盛者皆稽首颺言曰斯役也其在泮水之七章矣角弓其觶束矢其搜匪弓矢之烈固猷之祝夫旣作泮宮而淮裔攸伏古者出師成受於學其道固相爲用也今公思聖天子所以旁求俊乂文武兼資之意而建茲圃允

文允武昭假列祖我公有焉先是公覽郡乘觀所謂射圃者地在學西未建學西地者附旁贅居之甌脫而棄灰遺塵之所歸也始從民間請得輸稅爲芟舍者若而年公至是慨然思所以復之適學使者馳牒至至則以清射圃教騎射爲言迺謀于邑中賢薦紳及其屬吏洪聲逢昌曰射之宜圃也匪獨功令之爲顧驟遷則民病數代聚廬一朝斥去之上則何心乃議者又謂演武之西原爲文祠地地宜復而爲射圃誠兩便果爾則演武具在羣子弟而習之焉用圃爲耶然豈古者所以教士澤宮之意乎于是乃捐俸給

居民當徙者爲之具行李相厥居民皆如勿遷焉昔齊桓公夷儀楚丘之役能使邢遷如歸衛國忘亡春秋大之且也區處經營不費縣官半分之儲而古制頓復此非豁達豈第通方大適誰能當此而不稱厲者乎洪聲等獲觀厥成進羣子弟相與翻然造焉因思射之爲道獻士必試將祭必習上之爲教如此其重也可以觀德可以繹志下之爲學如此其切也今長人者與以進退周旋之所導以比禮比樂之場功顧不偉哉洪聲等得藉此以仰承功令督責之嚴俯盡教誨倡率之任身先被之矣爾都人士大夫亦正其

志直其體以觀化于君臣父子之鵠可也敢不志所
自哉是爲志

改建文昌祠記

張廷範

文昌之祀隸于學宮三能六匡之神竝妥柔于諸他
邑皆然詔置邑以來未有也有之自萬曆丁酉方伯
豫章青螺郭公始從鄉薦紳沈先生請檄下邑侯海
陽錦乾夏公建于儒林起鳳坊之左逼近城隅邑科
第以次二三輩起然未甚勝前形家謂重閣高濶掩
閉儒門之文峰蓋亦匪誣崇禎壬申署篆大邑念衡
劉公將有事于用革適以查刷行未果時有扶鸞者

詔安縣志

卷之十二

藝文

四

三百八十七

請于金甲之神曰南官朱鳥動三衡派下天潢壁水
清昭代人文收不盡好將祿閣問更生不知其解茲
歲丁丑之秋朱祇園公祖以江藩宗儁來叅郡乘按
視邑篆首詣學宮殆寓目而心異之會士民以解觀
請亟蠲吉捐俸集博士溫陵盧君李君命工飭具不
數日而祠宇成悠然南山文光射牛斗之墟離明載
闢在田快龍見之覩矣始信祿閣更生之語神已先
告矣明興尊經右文遠駕周漢今天子經學懋脩邇
復頒小學孝經于黌序其於讐較敦勉之意益諄諄
矣張皇克詰兼勵正鵠祇園先生經術經濟周禎漢

胤其棟文緯武之業奚啻更生甫視篆新學宮建射
圃修縣乘培文峰增雉堞清祀園復玉鈐威惠廟百
度維貞百事維新百廢俱興毅然以作興人材爲己
任凡諸衿掖入斯門而義義翼翼出斯門而濟濟師
師登斯堂相斯祀而溫恭有恪凡百齋心潔行反身
於正己輔仁之學以無負先生今日作興至意文昌
之神必以告帝矣行將連茹應泰襄厥中興盛業革
故鼎新于斯祀乎卜之間之文昌之神實主弧星卽
于月鹿當時孝友之佐文武憲邦之老與相燕祉今
祠圃竝建朱侯以賢親喆胤於吏治士風慤勤鼓舞
詔安縣志

卷之十一 藝文

四十九

三百九十二

於國家行葦菁莪之雅世篤周禎克副上心克慰下
情樂只君子邦家之光豈偶然哉小子廷範恭承台
命分光纂術從諸博士子衿末得觀盛美大喜加額
不揣不文而僭爲之記

港頭修路碑記

明周起元

戊午季秋余叅藩粵西道經詔邑出西關五里許有
村曰港頭港之下潮水漲焉港之上澗水洩焉其路
泥深數尺岸沒泥中崎嶇溇滑輿莫乘而馬莫馳商
旅魂消男婦淚滴余賴肩輿以濟目眩心悸越數日
尚搖搖靡寧者迨庚申秋齋捧北征載過是路坦坦

平平儼然康莊潮澗二水同歸溝壑商旅士庶謳歌
載途余覺色喜詢之輿夫佑客僉云鄉先生沈介庵
力也旋晤沈先生云不佞奚能爲役邑父母周侯勛
也嗣述以慶周侯輒避席云不穀何功是鄉士夫黎
庶募築而成者兩公讓德心艷之至叩冠衿耆艾咨
嗟嘆曰斯閩粵通道也傾圯甚矣沈先生惻然傷之
上其狀于周侯侯槩然肩任捐俸先焉沈先生亦捐
貲爲士民倡僚屬衿弁醵金以從侯卽命耆老二人
募緣好義者復諭附岍鄉社若港頭若雙港若磁窰
若寶橋若章朗與柳厝埭大小村落富者捐橐以助

詔安縣志

卷之十二

藝文

五

四百十二

工需貧者胼胝而負畚鍤未逾歲數里堤岍坦若周
行矣沈先生尤以岍之壞也率繇牛轆往來終歲軋
軋縱使堤固似城岍堅如壁未有不傾陷者載與周
侯議岍旁闢一轆路低岍四五尺面廣倍之以便農
轆輸運不與士庶爭馳岍上匪特商旅永利而牛馬
亦免喘息若周侯與沈先生恩及禽獸念更深矣是
舉也糜金百餘鎰而普濟遍兩省經營逾周歲而惠
澤及萬年主之者周侯倡之者沈先生募緣督理則
耆老許達卿沈大成勞苦居多各社居民子來趨事
而港頭一村鳩工施財獨倍他社均不可泯耳然非

周侯毅然以濟人利物爲己責安觀斯路蕩平也大雅之詩云周道如砥其直如矢繼之曰君子所履小人所視夫是路也如砥如矢信足誇矣周侯偕冠蓋履之予輩父老子弟視履廸吉將何以報德不朽余聆斯譚躡車塵望長安而去廸詔士庶不憚萬里復介紹沈先生來請記余曷能文聊述冠褐語俾勒貞珉爲詔世守且囑後人續修之勿忘周侯與沈先生盛心云周侯名立號本卓宜山名族祖以明經起家父瞻淇公魁粵西官郡守昆仲七人均舉春官科第綿綿未艾余叅粵藩曾式閭禮之沈先生名鈇介庵詔安縣志

卷之十二 藝文

五

三百九十八

其號立身忠鯁居家清白曾同先祖講明正學稱世誼爰書以貽詔子姓庶知尸祝畏壘焉

東溪石橋碑記

明薛士彥

丹詔爲金浦遐阨地界雲霄潮陽之交漢晉以來蠻獠奧區也自唐鷹揚將軍陳公元光偕副將許公天正李公伯瑤沈公世紀歐公哲統領河南固始五百子姓闢土啓疆名曰南詔塲道從大陂長田岑頭坳湖抵漳潮分界元至正間副總管陳公君用屯田詔境改路從半沙大上落窖裡至臨水驛卽北關外站前也官泮溪中石橋跡在焉迨我明嘉靖辛卯士民

奏設縣治越乙巳歲邑令廖公暹載改官路從林家巷東門溪而行病涉猶故也越萬曆丙申歲邑宦介庵沈公念詔爲閩粵通道邑治南向閩居左粵居右路從南行爲便乃約冠蓋沈君咸林君義許君惺沈君燦輩卜地東南隅前溪雅村後東路墪中隔大溪中從二都石隴而來旋繞邑治合建輿梁用濟兩省宦遊商旅爰懷邑令銘乾夏公慨然任焉計橋費近千金夏公捐十之五沈公捐十之三餘勸助各都好義者南北溪旁屬巨族沙地南爲沈明沈仁沈良沈春四戶公業助金四十鎰北爲林姓業尙無出也邑

詔安縣志

卷之十二

藝文

五

四百十三

中世宦分文不合其故難言矣肇工三載輿梁告成計梁十七塚長三丈二尺者十五塚五丈四尺者二塚共六十丈廣則一丈塚三尺率以松木碎石墊之往來士庶商旅幸履坦道喜增倍焉迺沈林二姓濱水沙地築市廛廬舍百十間利澤甚侈漳郡過客翁不容口不佞耳傾心注庚戌冬乃轉粵藩路經斯橋聆輿夫駿足羨夏沈二公殊勛埒覆載矣柰橋下水漲勢甚滂霈而石工苟且從事未三十載衝壞三之一士民猶病適夏粵本卓周公嗣蒞之介庵從吏重修捐橐補造費二百餘金沈君燦復率本族四戶子

翁捐金百餘兩勞苦十閱月橋梁復巍然屹立如初
詔人士欣沐夏周二公沃澤且謳訟介庵功德更鉅
至東城仕渡沈族子翁勞費滋甚擬豎碑垂不朽謬
以記托不佞愧匪任也故飭聞夏周二公夙政拳拳
在念介庵公以癸酉同袍清風勁節楚粵著聲居鄉
訓子弟戒童僕毫無侵損於民尤偕夏公創文昌閣
置漏澤塚偕周公建三清觀脩港頭路種種善勳邑
人士將尸祝俎豆于萬年不佞聊述聞見勒貞珉匪
阿所好也

三清觀碑記

沈 鈇

詔安縣志

卷之十二

藝文

五十三

三百八十四

儒釋道三教竝重儒尊孔聖釋尊釋迦而道家則推
尊老子朝制自京師迄郡邑均崇祀焉詔邑未創前
已建佛堂老子宮在城北隅被漳司理黃君毀之迨
設邑來孔廟首祀尙矣琳宮禪舍疊建九侯良峰山
麓而道觀寥寥典殊缺者余以邑西港頭官路傾圮
甚矣陳之邑侯周父母捐俸倡修修越數里坦然周
行社長許達卿沈大成懷余豎神宇茲土士民施財
鳩工未半載而告成所祀之神靡定也余侄孫國學
生孟麟肅而請曰三清道觀祀典而詔邑闕焉今舉
之爲是余未敢遽諾詢之鄉老士萌咸首肯焉猶未

敢擅專也爰命耆老道士呈請周侯輾然喜曰是曠
典宜敬復之遂偕少尹姚君邑博鄭師王師泊蓮幕
謝君巡宰楊君宜君各醵金從事而孟麟偕沈君洙
泊好義士庶塑三清寶像玉皇紫微于兩旁天地水
岳四府星君而伽藍直符儼然具備且邑中冠衿耆
艾率捐貲庀材剏齋宮道房爲設醮齋沐所推戒行
夙著一人居之而歲食則舊例港頭下泮後林三社
居民人等出穀一斗夙資總役糊口些穀移爲香燈
費諸士萌忻道教事興醮有塋咸誦周侯剏建殊勛
不泯尤以修路剏祠倡自不佞屬余紀其事余聞孔

詔安縣志

卷之十二

藝文

五古

四百十三

聖立教在好善惡惡兩端而佛氏云無善無惡冤親
平等老氏則云聖人常善挾物故無棄物故善人者
不善人之師不善人者善人之師其意與孔聖擇善
而從之不善者而改互相發證世謂孔子嘗學老氏
或然與茲路之修也祠之建也鄉社善士子來趨事
允足嘉矣卽有慳吝者有沮厄者蓋由良心未啟不
無少蔽至覩大道之蕩平祠之輝映未必不惕然歆
羨其善善本心靡嘗熄耳此老氏勸世一大關鍵周
侯崇祀道祠以補詔邑缺典亦神道設教意也若如
世道流受籙拜章希冀不當得之冥福焚符懺悔幸

消無所逃之鑿愆其惑世誣民殊甚匪周侯與余屬望士庶念矣爰書之爲詔士民告冀過門庭而覩神像當悚然思憬然晤大觸至善無惡念頭力修孔聖老氏教法斯祠之建永有裨也已是舉也主之者周侯輔之者姚三尹謝四尹義祀則沈洙沈孟麟始終効勞則許達卿沈大成拮据獨勞者道士陳復薛耀等勸造齋房均與有力余捐金倡率建廟祀神罔敢以誚謫勞怨辭周侯粵西宜山人家世閥閱馭卿周綿貞公已詳于修路碑中其仗義勸緣諸君子有功祠宇者俾書碑左以勸來裔云

詔安縣志

卷之十二

藝文

五十五

三百九十二

震屏泰山廟記

沈起津

今天下皈依岱頂者自腹裡至邊陲自五尺至六十莫不然矣然而程徑差殊展禮亦異北地及山以東西舟車所屈杖屨可抵者人莫不束身裹糧絡繹奔趨南方吳越江楚間或有之七閩則頂禮雖殷辦香不及北地靈應行宮有勅建者有私創者而南陲獨否豈靈驗之偏靳乎將雨天下之謂何余所以幾幾乎展聖之獨繆也歲癸酉有岱宗之役謁拜旣畢淨殿未竣顧瞻神像思得乞靈天孫分殿中之香火爲供養也未敢唐突也是夜夢先宜人云木甲神人傳

天孫之旨許以前願醒而乞靈夙懷逾勃勃仍未敢
唐突也再拜神前祈以筭而應者八或神不我棄也
稽首盥手乃請一像以歸擇雙屏之團聚處營神殿
一座前構拜亭使南方之陞自五尺至六十皆得伸
瓣香之誠也岱宗於前朝不過靈異之神府於昭代
則源可以通漕稅可以分祿裕餉鎮國護京而出其
餘祐獨不可以福南陞一帶土乎當不其然因爲之
記

九侯山記

戴冠

漳九侯以對峰得名京輔表于崇岑壤奠展于麗矚

詔安縣志

卷之十二

藝文

五十六

三百八十一

取義最晰而學者本圖經九侯傳夏緒之說迺謂禹
後之封其數九皆有神焉主之山意走章貢長汀至
小西天亘千里許當無諸盡處遠望一斤青而激瀑
奔沫乃不翅千包萬絡如踏滄海摩蒼穹恍忽江海
又適在頭上日月乃出其下山門兩大石初無闌鈴
客至輒有風如千隊萬騎自堂輿間放出遊人巾裾
與崖壁藤蘿花草相摩戛而鳴壁上大德中僧無碍
鐫九侯名山四大字及近代羅近溪沈心泉周本卓
諸題識皆爽颯欲動騰躍一罅天望海外國只一點
白光塔仙人棊盤裡真天門巨觀也門左西折有石

牛極淨徹眠香稻中上截徑似天府皆千仞許石欲
墜不墜疊觸而成縫合筍接有竅皆天下千丈潭日
光穿漏處復難爲涯底姑折而東長松修逕時聞鶴
鶴鷄犬聲對望巨石楞然如雲霄中人瓶鉢趺坐是
名三寶其下方香樹蒼鬱僧院在焉一道珠飛玉濺
再歷五儒書室天然橋濡足褰裳而至而所謂九侯
者殊相端好終日作禮几案間舍旁雲根注水盪激
是礪非松終古疑義然而霆雨鍾梵交作之中直有
一縷靜晰可辨老衲不厭也按圖記松礪雲根在巖
左松礪遠近穿引玲瓏以硎名者不可勝數獅子峰

詔安縣志

卷之十二

藝文

五七

四百十三

則跨其巔隙處又是一小天門能以惠風震懾百獸
其下鯉魚石噴薄淋漓有東臨碣石之意循雲根磴
道五六十層折而上始爲福勝巖巖中氣候又與下
方院殊絕袖烟幕嵐須臾不可認識石齒齟立類當
年編覆今已頽落省架樑劈柱之煩全展嵌坼現此
龕胎骨耳西檐之高接三寶石東乃爲飛來佛石船
丹鼎之所逢迎又東爲風動石香爐峰花餅峰則徐
歛微唵不可捉摹其蹊逕惟燕乳麝香往來非樵子
之所能至矣自下方院至此所遇墜碣殘碑皆李唐
宋元時物惟福勝巖始有清泉名號剗劃坼間清泉

與書室石屏梅月諸儒皆先後是山隱君子人知此
山巒壑之奇而不知由天然橋下跨幽絕險緣羅漢
太極桃源諸洞上飛來龕出頭盤折千丈峰只一線
地知香鑪花餅二峰之凌霄插漢而不知其擎立圓
淨供養三寶之莊嚴知隱君子之重山靈而不知山
靈之善獎接君子亦考圖經者未盡之責也嗟夫虎
丘六橋旣以鉛華口寶石梁大小龍湫猶有導從傳
呼氣咄咄逼人惟九侯扁舟溯流蕩漾長湖不三十
里徑至巖嶺下列蔡鳴騶之所不到真氣全著此山
耳所念巒壑依然然而名德春糧以寇盜豺狼退轉者
後之視今何如今之視昔吾將問諸九峰

詔安縣志

卷之十二

藝文

五

三百七十二

詔安縣新建預備倉記

秦炯

積貯天下之大命士大夫習藏富於民之說講貫不
精熟一旦出寄百里猝遇天災流行毋論經濟套談
如畫地餅卽有常平本錢桑孔心計而民情風土豐
凶斂散之失權宜者多矣詔故衝瘠彈丸歲庚午奉
奉

明旨念京東西河南北頗年荒旱議積不涸之倉爲
預備計鮮倣古入粟拜爵令

仁恩沾浹則不啻號之渙雷雨之解也屬人心厭亂
詔誦法經術子弟願紓

當宁急應成均

詔者若而人約輸可如干斛而余來方際爛杆收拾
之後有粟無厩日惟跼踏已度地堪爲厩縮版鳩工
覆蓋鋪墊猶無資懼委

君命草莽遂割俸入置瓦椽諏解東偏習射種茹之
圃而築之月而工竣廣袤各如干丈南北相向共門
而厩者十而稟遵

聖天子推一方以及寓內採鼃董長沙而通常平義

詔安縣志

卷之十二

藝文

五九

三百四十一

倉廣惠之窮頽其倉曰預備嗟夫天下事其何不宜
預美意之必繼以良法治法之不如治人事之暫而
可久者也若反裘負薪療饑剜肉則事之不可暫而
并不可有者也況天災流行有若茲役

聖主憂之萬方仰之前後此幼學壯行士大夫謀之
四乘八年桑林六事之旁皇太息猶溢簡編凡百君
子有不潔乃躬集乃事寬恤節減疏通期所以挽天
心副

明旨者三辰羣公方共臨之若猶是垣墉扃鑰風雨
鼠雀之兢兢雖幸藉手茲厩猶無追於耿壽昌長孫

平之訖矣謹記

新建演武堂記

屠士雋

詔雖彈丸負山面海控粵鎖漳閩廣咽喉也海氛土
寇間發靡常防汛之兵厥惟重哉康熙乙丑酌定詔
營馬步戰守兵共八百五十名欲人人得用宜時時
簡練此演武堂之建不容緩耳聞主也公率同屬員
捐俸興工經始於己巳十月浹六旬而落成公喜而
謂雋曰是役也不勞民力不費民財所以趨事勸功
成同不日也子當記之雋思演武之法蓋教以坐作
進退攻殺擊刺也書曰不愆於六步七步乃止齊焉

詔安縣志

卷之十二

藝文

雋

三百八十五

不愆於四伐五伐六伐七伐乃止齊焉其演於堂下
將坐於堂上然後步伐之節制無不明又合馬步而
教以射御也書曰左不攻於左汝不恭命右不攻於
右汝不恭命御非其馬之止汝不恭命帥非坐於堂
上亦何以見左右不攻御馬非正乎且自五人爲伍
什人爲什而演之以至於什百千萬多多益善兵雖
變而法惟一皆可自此堂得之也神而明之變而通
之天地風雲爲四正龍虎鳥蛇爲四奇中外有輕重
之權陰陽有剛柔之節彼此有虛實之地主賓有先
後之勢皆可自此堂悟之也是役也誠不可不記也

是爲記

序跋

太冲著賦邀士安以馳聲彥和成書藉隱侯以騰譽故志輯藝文所以增山川之色澤而文輯序跋又所以發藝文之精華也古今多有大部文章不必盡傳而獨傳其序跋使後之讀序跋者不測山中虎豹何狀想如罔象之珠不可必得則序跋實引人以不盡之思也志序跋

梅月百咏序

明陳汝輝

陳南臯曰此詩百有二十章今亡三十章其意不專

詔安縣志

卷之十二 藝文

卒

三百四十七

於梅月然諷誦之事君父隆師友推尊孔孟尙友濂洛左釋而右僊指明道妙崇獎風節若漢四皓三君嚴葛晉陶令唐李杜宋宗李張岳莫不評及至於范蠡張良陳圖南之流尤注想焉美矣尤點出漢儒之謬欲觀大化與梅月俱春則美而盡善者也或謂一韻滿伯難矣惜其不專梅月雖難而未妙入噫斯言陋矣今不暇他引只誦花草綿綿盈壤土乾坤個個與精魂兩言妙入非周程發不出直有萬殊一貫之義若止專於梅月則淺言梅月者非所以言是詩也

傍江書院十八景詩序

陳汝輝

傍江院耕樂漁隱之窩遨遊唸誦之所也薨瞰江波
飛塵不到門無轍迹佳趣無窮雙溪波岷山流出一
灣浪渤海飛來沔蛤蠟三洲翠岫生成圖畫大堤岷
一望白沙絕勝瓊瑤山色翠可供吟觀水聲長若助
吟咏後列老榆高柳宅高而擁簷旁見魚躍飛鳶窗
開而在戶水落波心而石出潮歸海底而泉甘醉後
泛舟曲岫邊尋盟鳧鷖吟闌洗研湛塘畔蕩漾天雲
曉日射墻殘紅半壁夜蟾穿瓦皎白滿庭至若野花
發而幽香契春和之生意池荷吐而生麗挹薰風而
長歌秋莫騁眸遠水長天一般色冬寒呵筆古梅霏
詔安縣志

卷之十二 藝文

李

三百九十八

雪十分春四時之景不同諸翁顧之皆樂且猶播之
絃歌爲其胸次以見得諸景物之間而皆暢之吟咏
之表題開十八景詩聯四五僊無非妙語

校編梅月集序

明葉 瑜

吾閩督學夏月川公旣正吾邑鄉先生之祀復檄收
其遺文將刻而傳焉得石屏梅月南臯三集吾師徵
齋姚先生以檄旨屬瑜較編之石屏南臯二集皆完
好梅月集多蠹壞乃偕庠友吳瑀宗嗣大建輩參考
焉輯其成章者釐爲四文類二曰經疑答述之文也
曰語錄劄記之文也詩類二曰百咏感興之詩也曰

襟咏酬答之詩也文則翁瓊州序之詩則陳石屏序之舊集分爲二文自爲文詩自爲詩今合爲一集而并存二公之序于編左梅月所得師友贈送之文若詩亦附錄于末以備稽焉其蠹余不可句讀者復三之一故不敢悉錄集凡五卷因其號題曰宋梅月吳先生集云

龍飛紀略序

林希元

龍飛紀略何紀我太祖成祖創業繼統之事也略何事或弗盡始紀其大略也紀之者何詔安吳子華甫也聖祖以天授之聖際五百之運提三尺起塗泥虎

詔安縣志

卷之十二

藝文

三

三百八十七

噬龍吞剪群雄執秦鹿經綸草昧重開日月誠曠古之

英也當其間關百戰收功於萬死一生之餘論道講

藝於投戈息馬之際皇圖霸業雖鬼神不能窺測聖

德神功盡天地不能爲容何其盛哉顧其當日行事

之迹藏之金匱石室不惟草萊書生日不及見廟堂

縉紳之亦有不及知者吳子生長遐荒糟糠不厭乃

能窮討旁搜著爲是紀良亦難矣紀凡八卷當代名

人若顧秋山洪覺山李中溪錢月川江午坡田豫陽

夏月川諸公咸尊信傳錄諸生吳天祿輩共捐資刻

之華甫名樸性善記書過目輒不忘於天文地理古

今事變四夷山川道路遠近險易無不在其胸中所
著有醫齒問難樂器渡海方經九邊圖本諸書又校
補三國志當道見之無不珍愛乃不能推轂使流落
不偶予甚憐焉故嘗方之史遷云噫若吳子者其終
不遇也耶

孝紀序

黃道周

蔡端卿有道之士也所輯孝紀十六卷問序於不肖
十載矣未有以應之不肖誠自忖少慙文疆長愧臯
魚惴惴焉奉先人遺體常恐不克自保或輾轉溝壑
或付鉞鑕鼎鑊爲先隴羞及一二知己之所恨歎是

詔安縣志

卷之十二

藝文

李

三百八十三

以臨文嗟悼抱經潛然不敢以餐飯茹痛之言溷告
於斗極之下頃年以來遂更隕越垂翼之矢淪於膠
腹曾子有言士有傷其體膚庖癩不滅鏹於肌骨君
不爲臣士不爲友死別於兆域之外生不與於宴祭
嗚呼此道豈復不肖今日之所敢言乎王休徵劉長
盛皆以至德聞於閭里地爲湧鱗天爲雨粟及一旦
國家多難黥默引身改適二姓竊楮北廷連姻僞主
然而格士尙談貞夫不以爲恥者謂其內行篤而藏
身固也卽甚不然猶以忠孝不偕代其回互以爲口
實嗚呼精義至命茂德通性士君子誠得閉戶而

中和釋地以拾醇懿言行滿世過咎不生雖覆五塊
以就樵蘇汰三怪以濯藜藿亦豈有所不慊於此哉
有子曰其爲人也孝弟而好犯上者鮮矣言夫國子
盡言處父好直之有所不盡也陸象山論學以孩提
敬愛可廢六經雖有激揚已進之論其大旨不失於
立身終始明堂享帝之說不肖比方爲孝經大傳以
至德要道本十八章其大戴所存曾子十篇曲臺所
記天子至士庶人之禮二百八十餘則皆附爲傳常
恨鹵莽不足以窺測淵微扶承聖化有感於端卿之
言歎禪救之已遲服膺之不懋也乃復揮涕贅於簡

詔安縣志

卷之十二

藝文

李四

四百〇一

端言念前賢若其有知應律汗青載吾鼎簡矣

環中一貫圖說序

薛士彥

環中之圖一氣廻環無一不貫且覺渾然無跡真妙
解也古有以錢貫喻一貫者則一與貫猶分爲二此
圖卽一是貫其功於易探求仁之方莫切於此且
其爲說燦然有理終始本末實兼該之後學持此以
爲的殆無望洋之嘆矣不佞初得此圖陳以靜室焚
香靜坐叅之踰旬彌覺不厭至三復其言不離一字
與唐一庵先生文集默相符契則林子之學想旣得
之宿世非人力也林子出自禮門其爲人靜定不羣

確守不阿蓋流俗中之卓然者不佞暮年幸遇林子愛其敦篤之行并愛其守一之義對圖披說亦足以老矣遂喜而志之

又序

黃道周

環中圖規制圓巧一緒縈旋如綰轆轤相推而成得一歲四時時三月月三十日日十二辰遠以當元會運世近以當分數釐抄進退之法似邵堯夫而其爲說以一明貫逐處員成如今日一日明日一日折如兩日只是一日事事體貼會到頭來只是一事故常把現在一環當往直來不須更設立言之意恍惚似詔安縣志

卷之十二

藝文

李五

二百五十七

濂溪余初見此圖疑其微巧及見有一時必有一事有一事必有一道隨時守一之說疑其小泥及再尋繹今日明一理明日明一理久則自然貫串之說乃知林子卓有入頭與考亭所誨下學同道又聞其蚤暮常肅衣冠事親長備禮節與朋偶處言動起立各有恒法始嘆今有志之士敦力邃往未有若林子者也林子名邁佳字子篤詔安人其先祖清脩竹軒隱君爲性命家言蓋世其學云

碑銘

文章日薄交諛成風不惟諛人而且諛神不惟諛

神而兼諛鬼蔡中郎猶興感于郭有道何況今日
陳龍正曰學者不毀人易不譽人難不譽生人易
不譽死人難未知斯義鮮有不受擲揄者志碑銘

贈光祿大夫資政殿大學士持節宣慰嶺南諸

道知南恩州前翰林知制誥湖南提舉諡廉獻

石屏陳公廟碑

宋方

來

漳郡守

維嘉定十有五年朝廷舉象賢之典錄勤勞之臣廉
獻陳公首有墳廟方來實董其事嗚呼古禮不復非
惟民非三代而吏鮮以三代化民者若陳公景肅其
三代之遺愛曠世之逸民者乎居家孝友三代之彝

詔安縣志

卷之十一

藝文

六六

三百九十八

倫也脩己學行三代之道藝也貢舉而拔文武三代
之賢能可興也一宰邑而伐惡彰善樹之風聲由守
隄而靖盜安民勒之金石制誥而贊王命宣慰而振
國威於戲斯道義高而藏再辭而起易簣而終太常
誅其行實隄守樹其封碑天子錫諡斯民成廟生榮
死哀三代備禮末世罕聞肇宰兩孤噐宇弘卓吳鄭
薛楊諸君較刊始末咸謂先生勤事至死德施于民
宜備祀典因卽講所漸山之麓下建爲祠上封爲墓
畢功而書于石以象先生之德以作後學之式碑曰
於赫大夫何天之衢以禮爲御以樂爲興受命作牧

威慈四擴制誥屠龍夙無虛族奕世承芳門第顯昂
入巖拮景金碧輝煌斯州官守篤公士友播詩樹碑
垂德永久三代衰兮道誰裁兮瞻斯塋兮寓死哀兮
重新詔安縣學文廟碑
陳常夏

章皇帝大一統之年詩人奏辟雍焉
上親政尤勸學詔雖極海忠孝經術士有光前聞皆
以教澤之厚四代三王爲家法故比寇深學毀以歐
陽工部十三載橫戈講藝之治殫力明倫堂肄業春
秋習射幸有其地 廟故未遑也孝廉姜公來舍萊
悵然謂振未墜以襄同文真吾事然近代教學之義

詔安縣志

卷之十二

藝文

李七

三百九十七

不明保無有干戚豆邊僅同象設或筦弦雖具聾瞶
如初羸絀推移之間婪者行私而怠者糜筭否急曉
諸生以親長君師非經外意日拮古誼課切之方告
以鼎新 殿廡之議士咸踊躍於興起未墜非吾事
誰事也拮据營度始某年月日迄某年月日霜日風
雨如是者三年無曠無私無濫凡如干緡不累公帑
而今海州黃侯洎後先同事諸賢亦無不襄厥成勞
者巋然靈光自茲始嗟夫大工大典必大有力任之
庠序教化率多謙讓方公議學時蒼黃百端寥寥子
衿復失業公以一手足興曠代之役吏公者幾不卽

爲訾公者而精誠所感一德交孚外而躬親勸相之
勤內而解佩脫簪之費均足佐時艱之所不逮非讀
詩大雅辟雍之篇惡知公此舉爲晰于先後本末者
乎記有之矣學者學爲人子學爲人臣學者所以學
師之所以教也維此大工公曰匪不穀之爲邦君第
子之功諸弟子曰吾師以斯文爲己任賢大夫豈第
作人之功匪予小子黽勉有無之爲此真子所謂身
教也真子與氏所謂匪知之難行之難者也士學于
四代三王矣惡有朝斯夕斯學其人而不思勉其難
者子公爲不朽矣公諱日廣閩戊子賢書視詔博士
州人

詔安縣志

卷之十二

藝文

李

三百八十五

長樂人歐陽工部公諱明憲先任詔安令鳳陽府宿

唐玉鈐將軍廟碑

林日瑞

縣西山迢遞瞰城內繪綾龍鱗下平行有地如宮闕
數石馬臥豐草中故玉鈐廟在焉其帶城面陽與東
南樓控引者則郡司農朱公捐俸所建新宮也西廟
自前朝近代不可考今趾又卽嘉隆間廟廢時遷廟
而拓之前後爲楹若干丹雘黝堊不飾不樸與廢將
百年戎馬荆榛亦皆可數而故老無在者但肅弁冕
趨而入稽首庭下則廟之所以世食是邦與司農公

所以力肩茲廟之意儼若告語焉公廣其廉博士某
尉某宣其力禹州判官某又率其亞旅文學某某鄉
三老某等合佐如干緝綱紀其事始崇禎戊寅冬某
月迄己卯冬十月公以視師至海上而茲廟適成合
樂讌落士大夫讓其有司有司讓其長長又讓於其
屬與民彬彬乎禮樂文章以對揚明神休烈今而後
神妥與饗可知已按神故玉鈐左衛郎將世守漳州
刺史氏系爵謚啓宇功業郡志及歐陽四門狀之備
矣不具論論其廟祀始唐迄今顯於漳而盛於詔牧
伯祠春秋村翁薦伏臘者千餘年與長沙鄱陽間祀

詔安縣志

卷之十一

藝文

六九

四百二十三

吳芮晉安祀閩王審知江浙俎豆蜥蜴碑等俗又端
午旌旗鼓吹導其故將廟謁如歲覲禮甚恭然畚君
會雲蒸龍變謹事漢澤易耳錢王乘亂割據不足道
惟神以命世儒英披荆斬棘建陳常之烈光祖父之
勲生建行臺身死討賊今舊德名氏又多曩與俱光
州人魂魄故應睠此定國勤事禦災捍患於法皆宜
祀也祀如法而謳思泯滅如廣陵羅池一再傳不可
識其牽惑傳會如鼻祠黃陵者又不可勝數也祀如
神方世世勿絕今國家隆平天子縣詔以鎮撫南服
聲教文物之盛什伯前代推厥所自山高水深乃或

者有憾於唐史謂紀載缺焉不知神狀顯於歐陽生
生文必傳之文也宋慶曆中始一修唐書只據舊本
五代散佚之後傳不傳未可知亦不關史事也且爾
鄉人知朱公所以義舉茲廟之意乎公丁丑攝令謁
廟慨然謂玉鈐公水木茲土於誼爲主爲父而堂廡
湫庳殊失爾民所以昭事高曾之意欲復於西不果
因卽其遷廟而張之而許之先太尉公天正故嘗立
功事神爲州將故趨事獨勤然世爲太尉公後卽安
焉而不知一旦知之來趨其主若父恐後者不可謂
非公之訓也凡公所爲比禮比樂周防固圉皆有干
詔安縣志

卷之十二

藝文

七

三百五十一

城腹心之略其大者則在茲廟而禍福之說不與焉
煌煌鉅典上下交讓使凡過廟者忠孝之心油然而
生蓋神默相之矣

宋宣教郎永福令北亭楊公墓銘

宋黃 幹

小其根其實不蕃流之長不如其源天命靡常定理
則存濬其源無伐其根不在其身在其子孫

賦

昔人有言曰才大須是作賦又云讀千賦乃克爲
之賦豈詹詹所易言哉陸士衡欲賦三都因太冲

而閣筆蔡伯喈欲賦靈光緣延壽而輟翰袁淑見
謝莊鸚鵡賦遂隱己作古人猶難之况後人乎雖
然宋世才人孰過歐蘇秋聲赤壁仙子文環尤勝
將軍武庫才人著作無所不宜覽詔賢之賦應作
是觀志賦

石榴洞賦

宋陳景肅

漸山去僊人峰二十餘里卓然屹立于長江雙峰齊
聳竝凌天雲而鹹淡之水縈紆出入被其擇注漚而
爲港向西曰梅港吳大成之小洲也東曰竹港紹興
庚午予始庵其麓闢其田以資講業旋南六七里巨

詔安縣志

卷之十二

藝文

七

三百八十一

石相向茂樹交蔭水瀉雲飛遙望南海諸峰神觀高
聳襟量弘大諸友鄭柔薛京楊耿吳大成亭其中以
遊憇多植石榴高下糾結四周綠垂澗泉噴薄穿其
內廓然有客可以筵几外則蒼蔚妍灼密不見人乃
名曰石榴洞其地高百餘丈迥絕人寰夏蒲節後翁
顏來會剛宰在側花灑泉清石陰谷應咸樂嘉境下
盼水心上撫峰頂爰坐臥爰脩省骨凝僊清若服丹
穎客有八予爲之主聯八僊之吟屬一主之賦分韻
附事以春夏秋冬爲之制風花雪月爲之度顏僊曰
大塊噓兮萬物春桃李未花兮先吐芬榴獨叢茂兮

翠團雲俟時紅爛兮照乾坤翁僊曰赫宣妍兮德專
夏發紅光兮香噴麝落百花兮誰爭價照洞天兮清
徹夜剛曰嘉實班兮垂秋僊鶴下兮夷猶彈剛皮兮
拋圓毬擘皓齒兮嚼銀甌宰曰隕萬木兮闔爲冬櫺
二花兮白間紅破雪夜兮開何穠操輕桃杏兮溘逼
松吳大成曰鍾呂來兮翔萊島之長風張李下兮垂
紫霄之冥鴻拉韓徐兮入石榴之玄洞同曹藍兮醉
金樽之碧醲鄭柔曰憇炎洲兮櫛正花靈朱明兮日
未斜笛一聲兮收暮霞蟾孤出兮光滿家薛京曰蜀
犬吠月兮越吠雪下界唇焦兮何時悅至僊人居兮
詔安縣志

卷之十二 藝文

七

三百八十

凡骨蛻石榴盈洞天兮高歌發楊耿曰洞留櫛兮櫛
留月泉注哇兮哇注藥百和香兮紅對酌群僊歌兮
飛玉屑八歌旣獻文極其選起請洞主舞以爲亂亂
曰綠枝未翠貫四時兮皓日宣威莫我欺兮肅霜凍
肌吐益奇兮密陰成洞流僊卮兮有灑有節松篁避
兮常結常開花不易兮石泉玉鳴永和詩兮朱明天
開長視世兮容與昏晨樂不寐兮九曲洞僊天獨知
兮

傷春賦

宋鄭 柔

噫春山勸農田事未幾偶見蓮花忽聞蟬聲則春景

換矣南轅未已相臣爲繞北轅未回將臣可弔傷如
之何乃賦自誚嗚呼青春在眼忽見時變形色已換
日月如箭庭柯已奏夏蟬薇垣甫集新燕景已入于
池荷香遠聞于一線鶯兔藏聲花香舞片太陽漸炎
涼風生殿效虞絃之阜財而吾民則疲于金戟思夏
閣之迎薰而吾土則裂于金剪景日移于漸老忠日
泯而不見一望黃流岱嵩隱見數峰若有中華青一
派胡塵來蔽面惻然零涕赧然面靦非爲己悲實爲
春悵匪春之悲惟人之怨孰函首于張毅孰梟首于
童貫六賊累我少陽三奸貶我胡銓吾悲中華一脈

詔安縣志

卷之十二

藝文

七三

四百二十三

如綫何日還漢唐之舊何日復商周之典一春怎不
予傷二皇遠莫予見橫議波頰是非日遠北苑花殘
舊荷莫返近日逆豎構大獄欲成岳罪致禍亂彼何
人斯作此凶叛嗚呼惜哉春光易換予傷難轉彈琴
無鍾伯伏罪乏鮑管予廼樹萱于涼園之陽把燭于
六陰之畔長蟬勁鞭幾度擊青帝之車與我逍遙于
夏苑乃歌曰回首神州百物空只畱二百小奇峰咲
持畚插開山土閑種蟠桃注臉紅再歌曰綠草未花
晚相間落日亂花點昏漢杖藜不去去芝山半掩柴
門坐長嘆三歌曰萬派芳流今冷落詞臣劍客愁蕭

索獨有悲春不肯回禾黍滿園坐痛哭欲破今春病
哭懷除是銷金復我國

漸山賦

明陳若愚

漸山高高插天安得振錫飛步陵其巔左睨扶桑捧
日枝右瞰十洲三島壺口之天僊青螺簇立天吳紫
鳳歷亂沃焦淵僊人玉女飛下如蜿蜒梁嶽空青三
十六九侯疊翠相迴環上劈兩峰起中軒如鞍韉溪
壑環轉江連天周遭不斷凌炊烟雨宿草腓匪壁古
嵐深樾秀青年年黃熊蒼兕削無迹須鳥呶嚶如軒
縣就中陳迹何不有榴洞白雲蕪沒久前有薛翁君

詔安縣志

卷之十二

藝文

七十四

三百八十九

後有梅月友石屏南臯經行處至今景物如瓊玖紹
興以來多俊英二楊三陳次第興清脩白業幾塵劫
孰非漸山降神爲之精漸山高高凌嶒儼如大將神
武爲干城半窗擲下金水晶豈獨芙蓉一朶青上傍
南斗天機衡我嘗南北東西行五峰五嶽固巨鎮崑
崙而下匡廬天姥柱天傾其余武夷九曲羅浮四百
不記名洞天六六福地七十二天台巖業掩赤城孽
來不覺眼眶豁埴視雄土無崢嶸梨關楓嶺何足云
掘擱削劣無幾層詎謂閩廣之交當縱橫漸山高高
幾許植梅僊子歸何處聞之天地初氣卅一元髓凝

者爲山嶽液者爲流水流水若無山綱維吾恐地軸
爲之圯倚與乎漸山高高難名我生堂堂七尺軀五
嶽四瀆備我形丈夫當爲者何事誰使嶽瀆爲清寧
欲學孫登一長嘯余音下震蘇門驚招呼安期曼倩
弔山靈泰華軒東溟雷泓風沈天爲聲惡用夔曠宮
徵鳴山乎扶賢助我成我生半百窮未已借問此客
固窮曾有幾乾坤欲納芥子裏幸藉山靈護終始

省元公隱侯山賦

明沈起津

六曆以除炎宋之餘地輔遘阨哲士僚虛睠亥步之
倒覆感羶穢而吁歎誰許吾國誰奮吾肱場苗旣惡

詔安縣志

卷之十二

藝文

七十五

四百三

崖館是紓昔者雲禎之簾織潁濱之亭漁休文之賦
憫國千運之詠樓廬彼性有所窺行爲獨持偶濩落
而無容且遯晦而樂饑況乎板蕩之大薪茶之期旣
不能使群蠻畏此蒼頭公而稽顙又弗能使朝端感
不暇郵車而議尼徒戀梁藻曷置鬚眉省元我祖亶
其異茲風疾衆靡屢顛一吏侯之鱗鱗可適侯之滴
清且漪於是醞芬滓愁傾圯謝簪裾抗雲水飛峻賞
于烟盤冀嶠廓以爲美任花朝之居諸何元號之可
紀觀其避纓溟登岵趾石嵌空而竦若列垣峰絳從
而巍若賜履霧喫瓊岡瀑瀉澗裏跨穹隆之磴懸入

瘁窮而隱几塵味既清幽阜亦并雲竿連繹以竇接
扈岑茵蠹而迭迎噴嶺樞三極之柱叢樹壯五儒之
旌誦道清之在壁與僊人而對枰斯固已歸次窮石
而濯髮洧泓者矣及夫雜响嵐曉鼉鳴雨洺甌裏白
雲鉢中紫蓼與席磚之僧負暄共遶田之童荷篠鹿
出龕兮草低鶴垂霄兮桂裏桃飄則一川踏紅螺歛
而萬籟送杪實騷思之欷歔豈逃名之矯矯吁嗟九
皇司靈百六已停氛妖遠靖維明之靈野無譏著士
多食苹余當搜公舊峙叩公遊壘問袞袞玉簫將以
持獻明天子其自今以始邀九峰之祉雪先靈之耻

詔安縣志

卷之十二

藝文

七十六

三百六

山靜雲縈鵬扶鵠起毋寧存中慶之之可擬

詩歌

或曰五十年之前見一作詩者以爲奇事三十年
之間見一作詩者以爲常事沿至今日見一不作
詩者以爲奇事矣昔人不輕作詩而詩存今日人
人作詩而詩亡此蓋爲今日之鄭衛言也詔邑詩
人彷彿唐魏遺風自宋迄今此風未改卽宦遊其
地者歌詠山川沮洳揚水莫或濫觴空谷之音寧
可多得志詩歌

咏余孝子

明蔡保禎

孝子小家子人奴不讀書天性自至孝萱幃齡百餘
終身無忤色食貧有旨蔬母食方進口母病不解裾
母死絕水漿幾不勝杖苴居喪不露齒除服哀如初
純哉喬烈氏至行吾所師

良峰

沈起津

陽陸團炎極曾阿灑太墟界當南越畔脉是碧盧初
儼象少陰合宅西朝爽居近闔多故識羸馬厭敝隘
極目千山表一筇數武餘土墳宜栢柳徑衍便琴書
侯嶺罨如畫南山簇似旛波間疑有國封內盡無諸
馘較麟麟擊春畦種種鋤藉苴茵六尺擿薜盤三蔬
詔安縣志 卷之十二 藝文 七十七 三百六十一

貰酒供開社呼朋勝得輿晴颺到面濶敲字出拳如
幾人邗外意一磬寺中虛憂國青衫舊選幽綠籜疎
莫將谷底思只當龍山臚靈驗垂垂發驕枝茁茁舒
風雲一咤叱時借退思歟

重遊九侯巖偕周仲先

明張燮

山徑阻且長重來每失路後發爾先登鳴禽倚深樹
禮佛還步虛攬衣峰頂度疊石吼飛泉適然生遠趣
不必坐香臺枕漱此焉駐逢僧摘山毛雜佐伊蒲具
凌壁鎖雲叢盤空散花雨良遊愜性歡曠懷絕塵慕
下山向天門徂芳幾回顧

洞仙梅花聯句

舊志吳大成與丞相陳俊卿三山林擇之聚樂賦詩即此

漸山之西小洲曲數樹梅花開賽玉

陳景肅

玉人欲舞

梅花前閑吹羌笛蕩塵烟

陳競

玩弄水肌奚忍去月下

徘徊歲將莫

林擇之

宵然仙夢同師雄醉倒瓊林大樹

吳大成

朔雪夜零萬木萎小洲寒花破雪蕊

陳景肅

憑

誰寫意寄法曹招得何公同醉歌

吳大成

相携梅花一

大醉

林擇之

解梅爭似洲梅貴

陳競

初稽山

明崔道融

初稽高跨九侯上蜿蜒松梅三千丈暮年登上雲錦

章杖履時來與春賞徘徊共指漸山東川流真與滄

詔安縣志

卷之十二

藝文

七

三百五十三

溟通胸懷不覺寬幾許扶筇同咲滿春風

九侯山

崔道融

春天萬象生明媚莫說九侯好風致鳥聲喚我推詩

成花氣薰人忽如醉日高烟散開鴻蒙僊人驚出胡

盧峰未審燒丹更何處時有僧譚九煉功

懸鍾八景

東湖戰艦

明蔡潮

飛檣躍楫搖旌麾鼓聲裏驅風雷盤旋翕歛浪花

舞蛟嘶龍吼山欲摧將軍素蘊平蠻策胸中萬變誰

能測腥膻洗盡凱歌雄浪靜波恬海天碧

西塞鳴笳

雉堞西頭控沙磧防秋遠借貔貅力清笳引動玉關情風露高寒江月白客子聞之愁不禁淒涼况復聞中心風外冷冷如唱和搗衣夜半誰家砧

倚石望洋

極目茫茫天作維浪花拍浪鳴春雷藐漢鷗鵬起雲翼輕鴻健鶴騰飛回頓遣塵襟開過塞到此真應笑河伯便欲垂竿連六鰲未辦絲綸空嘆息

登樓望日

昔年三宿衡山閣恨殺浮雲長作惡攬衣夜半候東詔安縣志

卷之十二 藝文

七九

三百十三

蒼涯烽堠

海溟孤嶂青入雲坤靈立界華裔分萬里秋毫歸望眼鯨波何處容妖氛天子清明古無比不用越裳遙獻雉邊兵飽食一事無年年弄網滄溟水

葑屋絃歌

天王德化敷寰土無數衣冠起戎伍燈火書聲雜管絃海國山城似鄒魯安得筆毫如長虹繪圖獻上明章宮東巡何敢厭荒僻遐陬正好觀民風

晚渡揚帆

半郊草色明斜陽沙頭喚渡人影長近海江波足風力歆帆蘸水飛危檣落霞歸鳥如相逐眼中一斥真圖畫古來平地有風波浪躍龍門莫深訝

晴沙曝網

海塗潮落沙如雪魚蝦到岸舟初歇柴門老幼笑語喧晒網晴沙補殘缺不愁魚枯海水乾且償私債還輸官高樓一飲萬錢擲平生豈識風波難

勝奠歌

奠在懸鍾

明張

燮

郡人徵君

扶搖水擊千萬里崔嵬亂石橫波起誰家試劍山欲

詔安縣志

卷之十二

藝文

八

三百四十一

裂誰家擔梯雲倒峙洞穴斜穿接釣磯恍疑架屋烟波裏幾回路斷又微連倏忽高低變屐齒魚龍噴薄海門東輕風猶發浪花雄海外茫茫何處山蓬瀛弱水路疑通欲往從之濟無梁據地長嘯邀鴻濛坐久起射東扶桑短腕仍彎五石弓昨日飛廉太昏黑漁舟一去無消息千家野哭為招魂破艇還歸生羽翼只今四海漸風塵戎容犀利烟水濱將軍自喜還自勞峴山雙碑行竝陳棹旋醉舞松雲下海氣青來上平野

郭將軍一門四節歌

明盧洪聲

吁嗟乎全節難全節之難豈其然何況將軍之門有
四節崢嶸皎潔秋霜懸將軍有母貞金石矢天存孤
心不易將軍之嫂絕代姿此心亦自有天知天生完
節天所厚不傳將軍傳節婦馬姑之舅陳姑兒玉蘭
摧折松筠壽古來白骨生芬芳當時二姑最可傷郭
侯廟食開南詔陳姑十八守空房丹青照耀雙王姑
節婦世續郭蒸嘗空房遺腹誰者陳含酸總爲九原
人君旣崎嶇死王事妾亦含咲雙入地爾時慷慨何
所難憑君骨血只加餐郭家耳世腹中兒青絲籠馬
黃金鞍吁嗟往事已如此破家爲國誰與比三朝不

詔安縣志

卷之十二

藝文

八十一
四百

散九疑雲紅妝一帶瀟湘水水盡珠埋冷畫圖可憐
少婦一孤無七星寶劍當門墮空床但聽春山鳩至
今明月深閨裡嚙雪凌霜仍未已香奩英氣阿誰屬
女郎猶記崩城杞將軍鬚髮亦蒼蒼熱血孤忠誰短
長嫂氏未亡弟許國曩時懷抱事幽北君不見陳氏
媼八十榮名千代寶君不見馬夫人哺姑跪乳事酸
辛又不見就義從容大小許雙眸炯炯如列炬一門
節義世所稀何況四節爭光輝古今事誰不朽兩手
拓開節義綱常世界天地久假令當時遺腹亦輕生
四世空房誰獨守

與黃太史遊龍潭

明張廷範

龍潭之山詫奇哉龍潭之水自天來分明龍門碣石
北雙峽排空映紫崖與君同生青海上未見龍瀑幾
千丈細聽龍泉有龍蟠清歌迸作瀑聲響

登點燈山

明潘士蕃

大岳恍天齊劄劄石澗湧上有清流泉俯臨千萬阜
夜疑驪珠遺藜吹燄二酉不雨驚電光劍氣豐城陡
星辰閃其傍日月懸在首人家火千門能如璀璨否
颺風颺然來白雲穿左袖飛僊挾與遊徜徉頻載酒

良峰寺

明沈鈇

詔安縣志

卷之十一

藝文

全

三百三十三

中山良獨峙群岳九侯連寶刹開蓮座爐峰映瑞煙
提壺懋半嶺濟勝上魏巔更酌一杯酒西來對聖賢

登良峰

張廷範

古寺中峰出雲霞海岱連江城多氣色平楚盛風煙
興復追殊代登臨到極巔浮青依斗礪仰止紹前賢

良峰寺看菊

潘士蕃

秋風吹埜草曲岫復成峽我亦尋芳去君從看菊來
花深偏隱鳥寺古已生苔爲憶淵明逕羲皇薄暮回

東溪

明胡文

仲冬風日好江上淨無波正坐着帆影中流發棹歌

荻蘆隨岸盡鷗鳥近人多昨日鷺舟楫今朝自在遊

謁南詔威惠廟

明陳正學

國書垂祖德漳郡關山河蘭菊隨時薦英靈是處多
金戈耀日月鐵騎撼鼉鼉荏澤近屏跡懸功靜海波

登九侯巖詩

有序
四首

張

燮

郡人
徵君

紫幔亭垂溪紆九曲之勝珠簾湖畔滌著九
儒之踪是皆震旦之多奇竝乃炎方之信美
若夫漳水南下閩山盡頭壁岫爭霞遙連齊
帝之石星纏變野漸近尉佗之邦攀巖得九
侯之稱拔地有千仞之勢遠企則朝青滿眼

詔安縣志

卷之十二

藝文

十三

三百五十三

躬涉則散綵同心王孫能來各主一峰之秀
儒矧未劣翻傳五老之遊固已詫異事於圖
經挾靈根于緯牒矣爾其天門乍闢丹梯徐
凌寶地梵鐘如臨霄漢之表化城慧矩細分
星宿之芒羗望岫以如歸乃懸崖乎直上泉
吼澗門而停屐挹山水之清音瀑翻葉隙以
濕衣娛枕漱之餘事高低洞穴開似假于五
丁叅錯藤蘿步疑窮夫章亥竟登高丘而望
遠海恍接浮袖而拍崖肩从英神遊茲焉觀
止屬孟秋之將半野性御風值清夜之微昏

山裝逗月幽禽宵語堪代九成殘英曉開
纏四照峰腰交經之塍埒滿布線雲寺杪蒼
蔚之林巒平蒸翠浪渴而命吸無煩松葉之
燒倦乃藉筇時復草間之臥山澤癯而屬我
丘壑置謂勝人礪坐旣借乎孟公遂忘期會
思玄宜抽乎平子爰托篇章

石門天半啓蘭若嶺頭懸有地聊堪隱諸峰盡欲僊
穿雲微見樹坐月屢聞泉夏緒傳何處山僧已杳然

其二

遠海浮三島前巒署九侯層梯朝麗矚複澗遞清流
詔安縣志

卷之十二

藝文

八

三百二十五

洞穴煙催霽風林鳥報秋拍肩貪久駐枕漱不能休

其三

尋常開石室絕頂桂香鑪濤氣青能入嵐光翠亂鋪
奇當客客試險卽倩人扶乞作蘇門嘯長披阮籍圖

其四

潰石時添水誅茅更拓峰洞痕餘古篆谷響問踈鐘
未信畿分雉從教杖化龍行厨休進酒沆瀣已先供

陪鄭使君遊九侯

鄭爵魁

倒履逢知己花封選勝來寺經千佛劫山自九侯開
淇露平郊滿慈雲片石迴從今題詠處仰止有春臺

福勝巖

盧洪聲

正想禪龕力懸崖撒手時定光開石眼法雨淨天池
月到山門古風侵鳥道悲此中真實義燕子近來知
華山庵謁道

明胡仲慥

鑿徑憑誰可悠然與共還結茅成草癖選石任谿灣
瓢笠欣初呈頭顱悔未刪逃空非削跡暫許一追攀

威惠廟

宋呂 疇

當年平寇立殊勲時不旌賢事弗聞唐史無人脩列
傳漳江有廟祀將軍亂螢夜雜陰兵火殺氣朝叅古
徑雲靈貺賽祈多響應居民行客日云云

詔安縣志

卷之十二 藝文

全五

三百二十七

九侯山

明戴廷槐

京華名勝半行踪又躡閩南第一峰山徑如梯同鳥
上洞門不鑰倩雲封從僧分得高春飯作客兼聞定
夜鐘身任九霄忘是迴那知下界有籠從

遊九侯巖

明葉 壘

逼人野興故難在此日侯山一再吟花塢春殘黃鳥
亂洞門晝永白雲深菩提無樹空中栢葵蔔聞香覺
後心解綬來從閑處老那堪華髮不勝簪

同葉龜峰遊九侯巖

明許 判

子真山癖相招引興逐秋風屐幾雙天倚侯山擎九

柱崖懸古木倒千章鳥邀夕照藤蘿外龍護金書牖
勒傍欲濯塵纓何處水夜深覺海雨滂滂

九侯山

沈起津

九柱巍巍土伯臨爲詢帝裔恣幽尋昔人何處埃虛
峙此地而今鼎尙燔支自天開山帶遠碑因神護垣
衣參一鍾可是釣臺饗呼取山罍滿滿斟

九侯天門

張廷範

冒雨攀躋最上頭九峰岿立建瓴侯噲訇泉舞飛龍
躍鱗鱗石攢化鯉游佛自有靈將谷劈天容一罅借
雲脩扶搖大塊雄風壯萬里朋昆振快遊

詔安縣志

卷之十二

藝文

八十六

三百二十九

招遊象江弔古

戴冠

呱呱心期有誰同東流恰與海門通江清問爾烹魚
膾酒盡相扶送晚風感慨經尋拒賊處顛危還倚斷
崖中嗣宗青眼堪療疾病起翻成一醉翁

華山還望九侯

戴冠

爾侯何逸豫臨去轉秋波猶識亂雲裡難隨飛鳥過
以香分石界爲雨動巖阿神色看還在煙花任濯磨

重遊九侯山詩

有序

戴冠

余以今皇七載重入九侯于是余生已廿
有六年矣撫生意之凋零顧英遊而若失葛

武鄉黃牛之記路是逢艱王子安山廟之遊
年方及壯廼褻回于驛路恐移文之我先此
地前瞰壺岡西連江粵勝國時羣雄割據積
草屯兵之地天門兩大石劈立如倚尤爲絕
險僊人以時往來其間自天啓乙丑至今余
凡七遊焉于時水淺原平巖風振條木葉盡
脫望天門有聲如驚濤直眺極巔巨海無際
峭壁千仞壁間有字跡皆磨滅不可讀移時
返照入巖廼復明瞭至招提日猶未入旁矚
諸峰僅如平掌夜復月明洞壑俱白山光樹

色疑非人間乃覽昔人興廢之由與同遊諸
君婆娑其下致足樂也乃若岫幌雲歸松關
霧掩藤蘿千尺對面疑人鈴鐸黃昏迸來似
雨源花雞犬聲漸出乎層霄薜荔璇宮客復
聞夫貝葉丹竈潛流則滙空林而積水福堂
香火則連香積以成霞豈復居隣近市真人
去而不還路入荆榛五丁病其費力者乎又
若石勢參差棧道躍于樹杪猿猱哀吟樵歌
聞而互答岡迴博望山鳥聞香鼎煉丹砂玄
都授簡則賞鑿出乎高流化權歸其掬握浮

圖高處胡僧劫灰之談四照光中莖草金剛
之現此嗣宗所悔其猖狂巨靈所舒其穹窿
也況乃風雲滅沒千態萬狀春則含煙夏猶
積雪及乎天朗氣清黃菊粲乎衣裳帝子降
于北渚紀羣英之姓字賦是流觴畱勝蹟以
登臨罰依金谷景詎一致趣有萬殊曩潘岳
寄懷于閒君白傅結友于空門情之所鍾不
信然乎至若玲瓏古剎猶記青泉劍戟森羅
都歸圖畫巨壑可坐百人潛行徑達千里顧
今日選石盟鷗之地盡昔人揮戈躍馬之場

風流已屬前朝臨眺頓傷往事況予生趣遭
盡寥落奚堪憶自童子卽到此山忽忽將二
十載于時吾師起東胡子結侶來遊羣賢畢
集雜坐迭唱未嘗不頂摩白日手弄蒼穹何
年歲之未幾乃同時而凋謝山川如故存沒
增懷昔人言自稽阮云亡便爲世俗所羈顧
此雖近邈若山河豈不痛哉況隆公法師亦
化異物東來慧遠笑江上之荻花北至道安
亦浮空而飛錫俛仰之間遂成夢寐自今日
以往豈復可知伯樊沈丈恐金石之不永懼

彫落之無期命予矢咏聊壯此遊予因綴翰
爲之今昔之懷畧盡于此雖在鐘致殊而興
懷則一云耳

天門中斷薜蘿垂轉入雲根路更奇客正倚樓山雨
暮僧緣持鉢晚鐘遲參差錦繡橫詩案遠近珠簾下
石碁明月不留清偈在却勞都講問吾師

其二

五更鐘鼓出雲間直到風晴響未還初日過林苔蘚
滑平蕪穿峽板橋灣岡迴石棧聞鷄犬溜下巖梯滴
珮環不是故人能載酒勞生那許托青山

詒安縣志

卷之十二

藝文

十九

二百二十七

九侯山紀遊詩

有序

侯山選勝爭奇凡枕流漱石之精靈皆道學
文章所緣起自洞雲深鑠鳴泉代講鐘者若
而年高士時時向往紫葢幔亭未敢培塿命
之也歲庚申溫陵黃貞山孝廉來視鄉校津
梁提倡之暇閱山記有省徂暑命駕訂遊村
庄又三易月而小園木犀香矣一日先生拉
許君千蔡昌湖刺船至謝子喬亦會遊興倍
濃夜不能寐餘醒猶在遂發清溪入長湖二
孫儀偉執先生瓶杖與湖之菡萏沙鷗並狎

咳唾俯仰逢迎稍北淺瀨橫湍高低旋折
忽易向始忘帆轉之隨湘源窮之得路也嶺
脚望天門有據地喘息者有振策先登者有
劃然天風出兩腋下而崕谷皆應者捫荔攀
蘿逕不容武徘徊間先得山僧腰鎌刊道而
前度天然橋濯足已徐拾雲根層級問訊飛
來磴欲墜而還倚鳥非狎而不驚長空沈寥
香氣微遶茶鐺酒榼金帶煌霞節爽籟以洞
簫通呼吸於帝座自九峰法席散後冥契幽
尋登臨眺詠之樂未有如斯遊者圖經臚列

覽不勝收松磻珠簾竹筧卽非復靈山本來
老樵尙能一一爲諸公數之獨福勝三寶以
西縱橫蕪沒故比丘持所引劃崖絕嶺百千
株竹中株間幽蘭一本者不可復到耳鬢頭
告返照匆匆揖書室而別放溜下谿村深夜
小樓相顧鳧動猶恍忽與臨汀之伍金陵之
趙洛陽之周大林石屏諸君子周旋也遊人
凡七人各有詩而命余爲之序

舊志伍仲求
趙嘉客周直

言大林飛仙石屏
翁書室諸儒名氏

同志在名山鳴榔乃得路溯洄練光平流連巒壑故

不能狎魚鳥何以隨烟霧振策望巖竒上有三珠樹
素風猶未湮玉顏不可駐如聞講時鐘一步一回顧

赤山廬居

沈 鈇

新阡隱隱赤山隅萬古祥光壯畫圖藤蔓劈開尋鳥
道苔痕磨盡見龜趺泉臺夜靜傳聲切鶯嶺燈懸照
影孤賸有五千藏閤室太玄今已授童烏

報慈庵

沈 鈇

祇園新闢紫雲封梵法親恩禮竝崇貝葉經翻飛鉢
雨長楊夜寂聽淒風豐碑題字千秋壯蓮社傳燈百
代雄欲叩遠公何處覓赤城慧日照芙蓉

詔安縣志

卷之十二

藝文

七

三百二十九

登南山新築峰

明胡士鰲

曉霽浮烟翠幾重俄驚幻出最高峰巖花有約欣相
對雲岫無心祇自封日麗晴川光鼎鼎春迴平楚綠
茸茸年來不勅登臨意握手長歌興轉濃

望南山

盧洪聲

城頭官闕勢籠從漲海兼收嶺外峰蹀躞果然青在
眼煙波還倚黛爲容當時天馬來西極此日驢驛獻
辟雖一自星臨華蓋後無人不頌使君功

良峰

盧洪聲

古寺于今幾廢興乞青人復向西行松間鳥盡啣煙

駐頂上丹疑煉石成座有蓮花容窈窕時無蓬累見
清平山城只在鐘聲外幾度登臨雙眼明

泰山行宮

沈起津

逢玄新闢幾由旬歷盡千盤步步勻亭殿恍隨平嶠
出霞烟疑向秘城屯策憑聖力何須漢封爲地靈不
是秦點點瑤華青一抹錯教懷草夢中親

冬遊華山巖

戴冠

丹樓開閉斷霞栖層折無妨送馬蹄策杖瀟然驚鶴
鶴橫橋頃刻放虹蜺巖深無雪鬚猶冷樹半堆雲葉
似泥不信巢松輪鄭谷知君心在數峯西

詔安縣志

卷之十二

藝文

九二

二百七

青雲洞

平角山

張廷範

謾言適海有奇搜鰲湧神冠此一丘駕漢已驅石作
柱憑虛更結蜃爲樓圖將五岳崢雙巘象應六匡柄
一公太室晤來探少室藏書劣與君謀

東江

張廷範

難逢佳水與佳山請乞誰能此一灣翡翠時來參結
構琅璈聲復寄潏潺得珠玄潛鮫人借問字滄磯螺
女還溟海粒冠多變現直鈎亦謾戲垂綸

東溪佛閣卽事

戴冠

六偈流沙了向東一溪春水磬聲中城臨碧檻花微

咲浪轉珠簾日半紅廬嶽肯容元亮醉東林恒與惠
連同風流前輩招携處明月猶疑照遠公

初稽山

明陳汝輝

雙髻爭妍削翠雲藤花鬪巧噴新春幽人不賞情何
限終日雲陰鎖石門

南詔道中書事

六首

張燮

叠嶺防顏岬孤村指斷橋叢深滿荆棘古木倍蕭條

其二

海氣易驅風巖容饒帶霧瘦馬亦太瘠十里定還駐

其三

行人半荷戈殺氣怒相逐樵者隔隴歸趁鳥騎黃犢

其四

瓦屋時漏日那堪霖雨時零丁沽酒處短笛暮烟吹

其五

簿尉坐中堂家家稱苦吏藏粟不救饑何以持作餌

其六

豕突聞鄰警連天赤白丸巢深時遠竄斥堠枉盤桓

飛來佛

盧洪聲

水到渠成未偶然莊嚴定與碧雲連年年飛錫黃金
在誰識雙峰不住禪

九日水面亭和鶴生支石年兄

張維機

晉江人左春坊

重陽勝節亂高軒面面嵐光抱遠村雲涉溪中猶帶
翠日從洞曲自忘暄閒將菊酒談今古咲把萸樽叙
翁昆回想當年落帽態乾坤尙有吾徒存

東橋

許徽

浩浩長江水澄泓天際流空中餘古渡岸上見虹浮
瀚海皆沙磧扶桑記十洲遡洄詢別業江築石橋秋
甘州五首之二三 有序

崇禎甲申臘闖將賀錦陷甘州巡撫都御史

林公日瑞死焉林吾師也作甘州五首

詔安縣志

卷之十二

藝文

九十四

三百四十一

從陷河湟隴道封西人猶未改朝宗賊何仁義皆槩
食道盡衣冠委戰攻破竹果然傳僞檄倒符安用活
司農諸君請莫癡城守自古封疆合盡忠

又

蘭河千里羽書飛峽口堅冰照鐵衣破賊當年判一
死櫻城諸將志同歸窮邊料碧萋弘血旅櫬長衝落
鴈暉二十四州無義士痛令豺虎迫郊畿

同歐陽明府分部監督城工時陰雨連旬霜風

刮骨工成藉慶更生感賦

陳洪圖

簌簌磬鼓此城隅猶是河陽舊版圖龜正不

會鴻歸竟罷鶴鵝呼十旬雨凍寒逾重百雉功成骨
未枯倘錄劬勞懲往事六千君子半丁夫

戊戌春賊艘覆沒沿海得我虛實移屯近郊我
兵櫻城雖時伺險爭利無敢戰者

歐陽明憲

深入遂郊壘迷雲蔽日船斷橋防鬪穴流矢及城闔
閱戶曾無百亡羊亦有年問誰關食寢慰撫獨漣漣

歐陽使君以建學大課多士士蒙賞者競奮樂

助榛莽中立觀環橋志喜
陳洪圖

縱橫遺碣早標名小大從公復此行天下文章容負

詔安縣志

卷之十二

藝文

九十五

三百五

荷橋門冠帶見升平代更遷謝靈光在及睹風流後
輩譙最喜連茹推慶曆昂然手版屈蘇曾

制府姚公捐創通省學田贍寒士興文教詔依
大學得頒銀六十兩置田如例

戴冠

甫傳鐘鼓右彤弓文德仍將纘武功拾標最憐星在
鬻翳桑初有澤歸鴻特分鼎養優寒素旋積神倉羨
腐紅南服豈能私俎豆九州聲教出關東

其二

復見山高與水清頓教緡羽重長城譽髦自古原無

數疆理如今已告成藉品琅玕爲吐哺纔資燈火便
橫經閩人亦有平堆雅蚤許齊名宋廣平

帽山墳廬蚤起卽事

蔡保禎

晚年雲壑最相宜況有松花養素姿單枕鶴涼朝起
早三泉人老夜歸遲說降但寫零丁去絕吭終畱趙
地悲勉爲綱常須藥物不應精魅輒爭欺

輓烈婦蔡氏

戴冠

一楹雙美百年迂隆萬恩深亘古無光岳倘分君不
死斯文垂絕爾追姑江濱寒日兼霜勁浦樹陰風任
鳥呼長說先皇遺澤盡何人不讀聖賢書

詔安縣志

卷之十二

藝文

九十六

三百八十八

輓烈婦黃氏三首

戴冠

對面霜潭徹底清寸丹自許萬緣輕只嗟黃土尋常
事不洗人間薄倖名

其二

不殉名義只殉夫不管鴻鷺與月孤分手只爭君兩
日先馳消息到君無

其三

鉛粉猶悲七尺身黃沙多少怨青春爲難爲易誰分
別只要當時見得真

和戴學博輓烈婦黃氏

黃圖鞏

誓死報君誓欲清此生久已鴻毛輕只知了却同歸
願寧計千秋萬古名

其二

方寸僅存妾有夫呱呱端不念兒孤世間多少鬚眉
者能及丹南烈婦無

其三

撒手懸崖不顧身空留墓草伴青春詩書粉飾尚餘
事名教綱維自有真

諒安縣志

志餘

志餘之目志每有之蓋因偶有未盡取附于末猶操觚之有補遺也亦取信不取疑取常不取誕取其羽翼名教而不取誇張異聞庶幾慎言其餘哉乃好事者獨採疑與誕者以附之類夫洪邁之志夷堅語云食糝者不肥況非糝乎茲志也慎終如始裨官野史之譏吾知免夫志志餘

胡丹諒字吾南號喬臨崇禎庚辰科成進士端方沉毅名節自持授江西臨川知縣至則飲水茹糲以興

諒安縣志

卷之十二

志餘

一

三百三十六

革爲己任邑舊有官民戶之分苦樂不均遂力疏削合於園狴中見男女混處嘆曰若輩雖罹青咎可令無別乎捐俸另置女監仍給月資壬午與省試甄拔皆一時名士著有撫臨吏狀行世未逾考成因忤權貴解組歸迨我

朝定鼎維時哀鴻甫集丙申春與邑侯歐陽公同監築縣城及衙署學宮城隍一時雉堞森然百堵皆興蓋實有勞績焉

孫如龍字

二都江畝坑人少習舉子業居家以

孝友聞雅重意氣與人交豁達露肺肝久不相背負

冠舉於鄉康熙癸丑登進士高第需次歸適當道
藩之變時逆亦廉如龍名邀致之如龍義勿往既又
遣所親休以禍福如龍乃毀服走匿山谷中得免上
論多之然竟以是得疾卒時年未三十也

吳說隨字

梅州人少穎異讀書過目成誦遇試

輒冠其儕偶性至孝寅卯之交山海椒擾都人士多
輟業說隨時手一編奉其親周旋鋒鏑間篝燈熒熒
未嘗不啣唔丙夜也庚申補行戊午鄉試遂登賢書
生平不妄交與不輕干謁卓然以風節自持竟不永
年士論惜之舉二子俱能讀父書

詔安縣志

卷之十一

志餘

二

三

李氏故邑增生吳楚妻武舉人吳燦母宗族鄉黨有
為淑女為孝婦為令妻為賢母之稱雖未表章于朝
亦既頌美于邑康熙庚午歲邑令秦炯旌其間曰姜
操孟訓云

盛氏耆民林萬壽繼妻萬壽前娶於蔡生四男三女
蔡歿續娶盛氏撫蔡所生如己出天啓四年烏山寇
發焚劫河東西夜半攻擁入室氏度勢難兩全急抱
前妻所遺子若女之幼者逃生而委已所生男床褥
中以去男被焚幾斃賴救不死今諸生楓陞循謹有
品行著聲膠庠卽被賊時所棄子也邑人義之比古

魯義姑鄧伯道焉邑令馬登科同里黃文明俱有傳贊紀其事

黃氏邑人莊從載妻從載早歿遺三子方在襁黃氏針紉撫孤茹荼飲藥代承子舍力出一指戊子己丑間邑大亂且游飢長者死次亦殞於道獨撫幼子得成立以存莊一綫之緒享年九十及見孫曾而逝鄰里以節孝稱邑令薛大章表其閭曰節孝流芳教諭黃圖鞏有序贈焉

莊門節孝黃氏孺人序

附讚一首

黃圖鞏

人生天地間節烈與忠孝並傳不朽然讀書攷古每

詔安縣志

卷之十二

志餘

三

三百六十一

不多得予忝視詔鐸間有莊門黃氏孺人若儒門淑女性行素端敬事舅姑克盡婦道無何其夫早夭氏屢傷心慟絕念身死易而存孤難勉未亡以承夫志且舅姑之奉無異往昔此風傳諸士大夫之口嘖嘖不衷乃予爲之按其實稽其譜則曰業儒莊公從載之妻也今徵其壽考則享有九十歲也其節高其壽永宜予之表之也且其子學頤君素與予知其孫正冠溫恭醇雅復與予爲文章之交悉以氏之生平苦節告予始與予前聞同遂爲之卽其事以表其行嗟嗟孺人之苦節旣完於前修幽芳可揚於後世宜其

子孫蕃衍科第永光天之道也予之願也特為序且
并以邑侯薛公大章一讚附書於後以誌名休云

讚曰霜天獨鶴婺婦冬寒尋常之女處也甚難此
黃氏者安若等閑勤奉翁姑必得怡顏勞苦撫孤

己茂芝蘭享年九十報績壤泉

康熙戊辰清明
日薛大章讚

